

四庫全書

史部

欽定四庫全書

浙江通志卷一百六

物產

六

金華府

香粳 萬厯金華府志金華府元貢香粳米

東陽縣志粟以

香粳為上自金華縣外諸縣均無貢由山田多故也其種有秈有糯色有黃有黑有丹其實有堅有疎有長短高地多種蓋山鄉多火種凡山平側而上疏者養柴二三年輒火之采火氣掘壟撒種穀嘗裂而作聲不移時而長無他工費但拔去其草而所入自倍如是數年即復養柴所謂休其地力

也聞之諺曰田荒如草山荒如寶殆甚言之歟又
稻種早有六十日嚴州早皆四月種六月收而六
十日尤早在田僅六十日此耕農所藉以接乏非
食租者所嘗也玉山鄉有仙居早收與平原中稻
同中則金成為總名有鐵馬鞭毛棄齊蘭溪矮白
枇杷黑枇杷把長枇杷矮枇杷鶯黃白落場青諸種
而以頭水金成為佳又有長稻湖廣秈秈味香美而
晚收類晚稻有芒皆舊志所謂秈也晚有二種一
為秈俗名雪稻有早雪長秈潤邊烏嘴馬頭蘆齊
頭黃冷水清諸種俱八月收一為粳有平頭黃殼
黑嘴紅皮黃芒烏節胭脂瓜子白羊草鞋諸種皆
性軟而粘用以造酒及作果餅甚佳平頭尤尚瓜
子最晚為山田所種今平原亦有之其早者名趕
陳糯種與中稻同而收同早稻又有紅芒雪紅芒
糯芒甚尖長山中人謂之野豬哽名雖麤而不可
棄也且其粒獨大為諸種所不及別種為早稻宋

時所給占城種也粒似糯微小雖大旱有收而所
入不多故山鄉有之而平原不種大槩早中二種
成熟雖異而取用略同晚二種取用各異而成熟
則同平原上暖日蒸稻熟不出八九十日以四月
種七月收八月而畢山鄉地氣高寒每日不滿一
畝故須百二十日始熟以五月種九月收十月而
畢諺云陽鄉一飽七月半山鄉一飽重陽爨此其
常也原田蚤者或以社前浸子立夏前插秧謂之
春田而山田之稻有遲至十一月刈
者謂之寒稻久而不落亦地氣然也

穄 萬厯金華府志黍稷之類山鄉多種之
東陽縣志

按釋名稷一名粱又名穄中央之穀中央土五行
為尊故稷為五穀長今農家於隙地樹之間以作
果餅色絳而味甘然不作飯也陶隱居生江南不
識穄為何米蓋亦廢而不種久矣今祭祀所稱粱

盛猶仍其名本草云以早熟且清香因以供祭祀然味極淡諸穀惟此為下種之祇以防荒耳此語頗有異同其別種為早鈴米相類而色白乃是稻種

麥

正德蘭谿縣志瑞山產瑞麥

東陽縣志其類有大小二種大小中

又各有數種惟胡大麥最早即所稱麴麥猶之大麥也大蒜紅等次之小有淮麥蠶青三月黃胭脂紅鐵丁頭等名蠶青無芒淮麥不染瘟黃諸病為佳收時多值陰雨宜速不宜遲諺云收麥如救火又云帶青收一半合熟收一半過熟則雖天晴實亦易落別種為蕎麥與二者不同白露前撒子至霜降後收開花結子收刈皆以十八日為期或經霜則敗故俗又名花麥農家以此為救荒之穀歲旱則此穀易生而有收蓋地力未盡故也

豆 農政全書婺州以南平原有白豆田豆撒豆諸

種山鄉惟山豆可蒔

東陽縣志白豆喜燥以二月末三月初種六月收亦有遲

至四月種者齊民要術云春大豆須植穀之後二月中旬為上時三月上旬為中時四月上旬為下時地不求熟鋤不過再即此類也田豆喜濕早中二稻收後始種頗費工其木收而間撒其種於隙者謂之撒豆工費較省然不甚貴重皆七月種十月收畏霜山豆色黃而粒大以四月種八月收火種者工費更易大槩諸豆工費都省不比稻麥也又大豆俗名園裏豆多於家園中種之烏豆種塍間俗名田塍豆可入藥亦有白色者與青豆菹豆赤豆虎爪羊眼諸豆皆不多種惟佛豆蠶豆廣種於未熟時刈之以料田不以供食佛豆一名豌豆農政全書曰二豆於百穀中最先登蒸煮皆可食

荒年宜多種肥勝之云大豆保
歲易為宜古之所以備凶年也

扁豆 東陽縣志皆附木而生又一種名雞爪亦名
老少年莢肥厚又有紫扁豆花莢皆紫亦勝其別
種為刀弰但可糟食

麻 格物論九穀之一也山鄉多植黑者入藥麻榨

油更香烈

東陽縣志麻有數種園地多種芋漚治
為布堅而耐久精治之作縑絲勝葛笑

蓉麻但於水岸田塍植之作繩索而已又一種名
絡麻高丈許用與芙蓉同按月令仲秋天子食麻
今但取皮為布而實皆棄之然亦有無實者傳曰
有實名苴無實名杲今所種皆有實而且多詢諸

父老云麻子仁入藥病者煮粥食之何得云不可食今以隙地種之刈後更不鋤治來年所發皆風根安得有佳實哉以一邑推之穀類之最失其本者矣

臺菜 蔬譜即油菜東陽人謂之芸臺以其交春抽

臺也

東陽縣志此菜香味鮮美其子榨油取用甚多其查用以料田名油箍勝他物故多留以

蓄子

窠菜 東陽縣志其形似窠托田中土人多連根挑之甜美可食

九心菜 萬歷金華府志蔓菁之類一顆叢生邑人

以法製食辛辣逾薑桂其子入藥

東陽縣志蔓菁菜與北方形類

不同三春惟此為盛夏月乾之用鹽和蒸香味皆佳辦濶而白者曰白菜惟九心種生煮最佳

爭春菜 東陽志南鄉有一種柔條木幹先諸卉而

萌土人謂之爭春菜味苦而清鮮菹皆可啖

紅花菜 金華府志取嫩苗乾作蔬名紅花菜

蒼蓬菜 東陽縣志色白微黃其瓣極濶肥美異常

抽心則不可食

萵苣 東陽縣志萵苣名善菜但食其葉雖抽心亦

採心盡乃止

莧菜 東陽志有紅心菜即莧

東陽縣志此菜與映山紅同色須采其未

開種之則易長最耐人採採盡復生數澆培則類新種老作乾甚佳五六月不可得食更布種亦易生不甚長而味甚鮮別種為馬齒莧生野田中香味更別採作乾煎理腹病

南瓜 萬厯金華府志山鄉多植可為蔬

東陽縣志此土瓜也

花實皆金色四周有瓣痕其皮色碧綠而光圓者名北瓜明萬厯末應募諸土兵從邊闕遺種還結實勝土瓜一本可得十餘顆遂徧種之山鄉尤盛多者薦食外以之飼豬若切而乾之如蒸菜法可

久貯
禦荒

田瓜 金華府志田中所種可生啖不可多食人家以諸色醬醃之為旨蓄比他處特佳蜜煎亦作果

品

東陽縣志黃瓜鮮食不能多醬食不可久

西瓜 東陽縣志紅瓢黑子者佳然紅子為多其佳者產孝德鄉

茄 東陽縣志亦名落蘇有紫白二種夏食為宜秋茄則味苦土人以中元和麵為餅名拖茄

芋 東陽縣志水芋種水田中禾榦紫色為紫芋體

潤而滑山芋不甚需水禾幹色黃抽心開黃花謂之黃芋蓋農家煮之以飽腹非止作菜也香芋須一二年掘用其子根乃大而香園圃中偶種之

薑 東陽縣志邑中種薑收數倍之息人多以穀易之擇肥嫩者和以酒糟或米麥醬可久藏

蘿蔔 東陽縣志煮食自佳熟而乾之亦可久用鹽壓生乾不及也山鄉類用火種法重至數斤鑊成絲乾之四遠通行

野菰 山家清供東陽人每用鹽淹菰字義云菰四時常青有松之操此惟野菰為然種則不出也

山藥 農政全書薯蕷為雜植第一所在居民種之

東陽縣志俗謂薯藥另一種為甘藷俗名紅山藥種法鑿坎方廣令深但壅土而已不須鋤治用力少而利多一畝可收數十石

蒜苗 東陽縣志大為大蒜小為小蒜蒜苗不甚採食俟抽條取浸之用以辟暑善蓄者用糖醋浸之經年愈妙

麥葱 東陽縣志與麥同收者曰麥葱又有四季葱

山間有不種自生者曰胡葱與小蒜相似

山粉 萬厯金華府志即蕨粉以其出於山故名蕨

隨處有土人能淘之成粉功力甚費而所直不多

若他處解作粿麵當盛行

東陽縣志根可作粉淘汰多者色純白名粉心

用作粿麵甚佳每當歲歉時就山中擇地掘取細舂浸之力加淘洗以菜調之作羹可飽玉山瑞山等鄉不荒亦取土商販至蘇杭絹帛行多買以作漿舍此不可用

蒲盧 食物本草東陽蒲盧有長至二尺者

東陽縣志長者

曰長蒲短者名瓜蒲皆甘可食埤雅曰長而瘦上者曰瓠短頸大腹曰匏其注云匏苦瓠甘瓠可食匏可繫此與本邑所種不類蓋泥論語繫而不食之義耳凡匏皆可食不食則繫以俟其乾老而挾取其瓢以用之聖人之言為人誤解余見說家云匏性輕浮繫之腰可以渡水此言良然嘗詢之農家云種時不可沾指沾則苦不可食但老而剖之為勺器不剖則用以浮水若盛酒醪貯子粒須是甘蒲其細腰蒲有大小二種極似畫家仙人杖頭所掛圓正可愛埤雅云細腰曰蒲即此類也

筍 武義縣志猫竹未出土曰潭筍味最佳又燕筍

乾嫩而淡者佳

樹衣 霏雪錄金華山中多有之僧家以為蔬味極

美貫休詩云僧採樹衣臨絕壑指此也

襪兒花 東陽縣志其形似襪不足供翫好取將開
之藥煮食風味特勝乾之以點茶亦佳此惟東邑
有之

金蜜 萬厯金華府志夏取為良不著假者其色如
金蠟之佳者其凝如脂冬蜜惟山中有之稍劣

腐絲 東陽縣志田豆為上山豆白豆次之撒豆為
下質性皆受和煙薰作乾香味尤勝但不解作乳

近乃切乾成絲其細如縷謂之東陽腐絲云

桑 農桑譜東陽種比浙西高大一二倍較湖桑則

頗小

東陽縣志桑種甚多世所稱者荆與魯也浙西所植枝條桑短魯桑之類也湖桑即荆桑

也荆桑飼蠶其絲堅韌本邑頗近之栽接培養皆如法其不接者但以食原蠶不貴也

桐 方輿勝覽城西寶婺觀古桐森然諺云桐齊簷

出狀元

檀 武義縣志石倉嶺之旁有老檀高十餘丈年豐

則發葉早儉則遲農人占候多驗

檇 東陽志義烏雲黃山雙檇木傳大士結菴之所
櫛 東陽續志櫛可作屐惟此達省中裁斲如式而
後致之惟正北諸鄉近諸暨水路為然餘不能也
實可食水浸去其澁品味最勝乾則僅可作粉
擇 東陽縣志大者宮室之材未成榦者嫩葉柔條
香氣酷烈耕農於三月盡刈之踏入水田中謂之
採青乃土功所首藉者又一種名活腦入田力尤
厚其實謂之擇子夏採作腐

柏 東陽縣志俗謂之栲其實名栲子堅白如脂煎
燒成燭亦名蠟燭蠟本出義烏今山鄉所產色黃
而油少其仁榨油名清油清者為佳其滓成餅以
料田其殼燒作炭入爐用亦佳

紫石楠 平泉草木記東陽之紫石楠

楓香木 名勝志義烏縣香山產楓香木

連理木 東陽續志東陽淮巖山產連理木大百拱

鐵樹 正統義烏縣志雲黃菴前有鐵樹枝葉剝落

一榦膚理不腐頑墨如鐵

桃 東陽志單葉花紅其種最良東陽西鄉高城廣

植呼為高城桃

楊梅 正德蘭谿縣志湛裏源產

石榴 萬厯浦江縣志鐵甲山多安石榴花開如錦

袍楊甲

栗 東陽縣志出瑞山鄉者佳安文尤著稱安文栗

大盈握大小間雜者名五花栗小名毛栗園圃所

樹僅供茶果而已一名榛栗風食甚佳

柿 萬歷義烏縣志有紅珠野猫棗柿小柿油柿數

種

東陽縣志大者火薰作餅久而凝霜勝吳下所
驚青州餅小而丹者名紅珠柿更勝但不多長

而圓者名牛奶柿無核次為牛心柿稍興又次為
雞心柿類牛心而小通謂之柿棗切片者名柿花
皆遠致隣郡又一種名羊阿柿
細小無皮核最美小兒所食也

南棗 金華府志出東陽茶場最有名

東陽縣志浙
東西諸大郡

遠至京師皆珍之猶仍茶場之名然他處只知此
名不能察其樹木之有無也其次謂之魁棗又次
名通新棗平民收得一二石者亦自走錢塘得價
則還納糧稅惟然如諸般一熟也舊以茶場所出

為佳相傳其大如拳其核尖細如黍決之即脫其
甜如蜜香而且脆以此京師皆盛傳之今茶場漸
少惟東南諸鄉於阜地上植之頗廣優劣不一大
槩未熟輒擊以湯激之使變色謂之湯紅乾則其
色紫已熟者名樹頭紅乾則其色丹堪入藥用然
不多有過熟者須以所煮餘汁煮之色味皆似蔗
糖謂之糖棗此以時食為美不作乾也若其大小
則易辨矣棘則小而圓木本不異而性味殊佳者
勝棗

榧 東陽縣志產玉山瑞山等鄉收後將灰拌之令

乾謂之灰榧炒食甚香最佳者細而長名蜂兒榧

種不多得

葉適蜂兒榧歌平林常榧咬狸蠻玉山
之產升金盤其中一樹斷崖立石乳陰

根多歲寒形嫌蜂兒尚粗率味嫌蜂兒少標律昔
日取急欲高比今我細論翻下匹世間異物難並
魚百年不許贏栽添餘甘何為滿地蒞荔子正復
漫天甜浮雲變化空俯仰靈芝醴泉成獨往後來
空向玉山求坐
對蜂兒還想像

蔗 義烏縣志向無此種順治年間從溫州得種乃
競栽種之而地力不稱利頗微其製為糖不曉作
偽得法者真足稱砂糖耳

蓮 東陽縣志湖塘平淺者多至十餘畝香聞數里
不減西泠其莖甚細僅可鮮食藕作粉甚佳葉則

時收貯之

芟 東陽縣志四角無刺者佳六角多刺為下八九

月貧人多就水塘摘而煮之以易穀亦當一熟

玉蘭 花史蘭谿產玉蘭

萬厓金華府志蘭谿香山產玉蘭無葉而花白有香

海棠 東陽縣志有鐵榦細膚垂絲等種鐵榦以櫻

桃接細膚以木瓜接垂絲以桑樹接

玉茗 東陽志似玉仙採而乾之夏月點茶能解煩

熱他種有寶珠石榴湘妃皆假其名

紫陽花 東陽志紫色鮮妍可愛產石洞書院云是
晦菴講學時所植

賽洛陽 東陽山水記登瀛山產更無雜植好事者
多賞之

萱 東陽山水記東陽東白山有古寺遺址廣延數
百畝多生萱花開時居人持筐採之

瑞香 東陽縣志花如丁香春開次第千朶俗名千
頭草婦女以線穿之繞髮髻外謂之花髻

蘭 方輿勝覽蘭谿一名穀水岸多蘭菰

正德蘭谿縣志香溪

即蘭溪之下流蘭香至此益清故曰香溪花史蘭溪蘭陰山多蘭蕙明一統志武義菊妃山多蘭菊

麥蘭 蘭譜產山谷中香清可愛植則以細沙培之

沃以清水即活不畏霜凍亦花中松栢姿也

紅蘭 蘭譜惟深山中有之其色純紅香少減

四季蘭 東陽志產自福建今成本產亦有四季開者灌忌井水栽法更艱大槩與麥蘭相反

風蘭 蘭譜金華山巖壑深處懸根而生但用亂髮

觀之空懸自活根即石斛

珍珠蘭 東陽續志亦名賽蘭本非蘭種以其香氣似蘭而郁也花金色亦名金粟蘭形如魚子名魚子蘭開時如貫珠故名莖以棕絲繫之又名弔蘭用以貯茶香味俱勝名蘭茶

瑞蘭 蘭谿縣志縣出白瑞蘭

雙頭蘭 婺蘭紀會宋咸淳中蘭谿之南塘山出瑞

蘭段綺為贊刻石縣治

正德蘭谿縣志金似孫植蘭於庭前號曰蘭庭其蘭

忽開花
而雙頭

水仙 永康縣志千瓣者名玉玲瓏

茉莉 永康縣志有木藤二種又名抹麗謂其能掩
衆花也

菊 菊譜婺州有銷金紫菊銷銀黃菊乾紅菊乃佛

頭菊種也

東陽山水記武義縣小
姬山姬水溪多產美菊

竹 金華府志篁竹質軟可作器一種皮色純黃間
以綠線花圃種之若紫竹斑竹則二美兼之至金

竹水竹利用尤多雷竹入藥其方竹鳳尾竹月月竹間有之又別一種為天竹非竹類也

毛竹 金華府志東陽毛竹可作器

東陽縣志竹產不如鄰郡之多

而堅厚却過之作器耐久其大者高五六丈豎之簷前為夜燈謂之高燈每冬春之夜遠望如星火又迎神以帛或布繫之長旗此他處所無新出時可作紙去皮可編筏筍為一春佳音未出土者不知拙取蓋不曉土鬆則彌盛故耳

山竹 金華府志出東陽幹細可為筆管筍亦佳

箭竹 正統義烏縣志青潭山之東山源之口多箭

竹

東陽縣志中實如箭
葉甚大土人名箭箬

石竹 武義縣志石竹小而密土人植為籬

花節竹 金華府續志出東陽金蒙山他處無有其
節線連環異於常竹神杖用之

茶 茶經婺州次東陽縣東白山與荊州同品茶要

錄補婺州之舉巖碧乳

東陽縣志大盆東白二山
為最穀雨前採者謂之芽

茶更早者謂之毛尖最貴皆揀做謂之揀茶茶客
反取粗大但少炊之謂之湯茶轉販西商如法細
做用少許撒茶餅中謂之撒花價常數倍正德蘭
谿縣志茶山山谷深窈草木森蔚而多茶萬歷浦

江縣志二都三都二十四都二十八都出茶

酒

名酒記金華府有金華酒

談薈藝之酒有錯認水

東陽酒

食物本草東陽酒最佳自古擅名

麴本草其水最

佳稱之重於他水事林廣記所載釀法今則絕無
惟用麴麴蓼汁拌造假其辛辣之力俗人因其水
好競造酒味雖少酸一種清香遠達入門就聞好
事者清水和麴麴造麴米多水少其味辛而不厲
美而不甜色復金黃瑩徹天香風味奇絕此皆水
土之美故也東陽縣志水白米白麴白謂之三白
此為上品不與姑蘇相襲也次則皮粉合造之麴
名常酒又一種人家所造浸米或至一二十日米
臭即酒益香麴以諸花及稻苗露為之名花露香
味極美又有重之以椒者謂之真珠酒皆不益人

別種為白酒夏秋間造隨時食之東邑水源多出
山脉米麥之性亦異他處故酒味辛烈舊東陽酒
殆以郡得名今惟蘭陵遠販武義次之全與本邑
不類錢惟善謝送東陽酒詩故人遠送東陽酒野
客新開北海尊不用尋梅
溪上路春風吹與滿乾坤

澱溪春 談薈蘭有澱溪春酒

香山酒 韓翃送金華王明府詩黃蘗香山酒

桃花酒 永康縣志山中有一種千葉桃花以酒浸

飲之除百病名桃花酒

花麴酒 東陽縣志大者開花入藥小則隨處皆有

伏月採之浸造酒麪較他處特勝

茯苓 永康縣志自生者佳土人以法種之五年掘黃連 明一統志各縣出黃連

松脂 東陽縣志深山老松遠不能取材四周多鑿為穴用竹筍蓋之久乃剖取如是一二次皮色皆白體輕易乾伐之為勺器具根枯朽則種茯苓

細辛 本草衍義東南所用細辛皆杜衡也

名蘭別錄今用

東陽臨海者形段乃好而辛烈不及

雪查 萬厯金華府志類蘋菓晚摘者名雪查尤勝

香蒿 永康縣志產山中一名香菜暑月可作蔬

香附子 永康縣志一名地久薑古謂之雀頭香魏

文帝遣使於吳求雀頭香即此

天門冬 萬厯永康縣志金勝山少竹木惟產天門

冬最良

放杖木 本草拾遺生婺州山中如木天蓼老人服

之一月放杖故名氣味溫甘無毒治一切風血理

腰脚輕身變白不老浸酒服之

金星草

嘉靖浙江通志味苦寒可辟丹石之毒

淡竹葉

萬曆金華府志東陽縣元貢淡竹葉

理皮藤

金華府志皮有文理造紙最堅土人煮竹

籜和之東陽永寧鄉白溪能造其地近剡故爾

梨藤

東陽縣志其條細擣如綿取汁作紙膠最良

俗以之築地堅如鐵結實如棠梨可啖葉可肥豬

黃藤

東陽志其花可食又根類蕨可為粉

香絲藤 東陽志似白藤而脆可雜用其子可食

紫河車 東陽縣志土名金線重樓可消臃腫

白石乳 宋濂蘭谿洞巖記洞巖之山玲瓏而鬱紆

其靈洞凡六 一曰白雲產石乳倒垂遠望縹緲晶

熒奪人目睛極可翫

金華縣志嘉靖十八年有人鑿石忽露一竅大如缸秉燭

進一窟頗覺寬廣上皆石乳多黃色再進深數窰之後懸者皆如冰雪醫云此即石鍾乳也好事者

或取為几案間之翫

飯石 宣和石譜婺州東陽縣雙林寺傅大士道場

山中產石凡有青白紫綠色皆瑩徹謂之飯石質

細碎堪治為數珠或作紙鎮

嘉泰會稽志即紫石英寺僧以飯石神其

說

靛青 東陽縣志興葉名蓼兒青不甚佳圓葉者馬

蹄靛山鄉皆種發之以染絲布色深碧另一種名

萊豆青又一種名鴨綽青

靈草 萬厯金華府志陽春洞仙壇上多產靈草

席草 東陽縣志其體三棱善織者價值蘇席之半

剪草 本草綱目剪草惟婺州者可用今遍訪無有
識者或云即茜草

定風草 武義縣志邑產定風草

龍鬚草 元和郡縣志出金華山赤松子得道處太
平寰宇記又有比龍鬚粗大者名為虎鬚

烏 東陽縣志顏烏孝子築塚時羣烏啣土故至今
多烏其地名鴉塘

索馳鳥 嘉靖金華縣志金華山頂有鳥名索馳羽

毛五色

長尾媳 萬歷義烏縣志烏有長尾媳

白蝙蝠 正統義烏縣志黃山洞白蝙蝠有翼盈尺

山羊 永康縣志永康民有以山羊獻於縣問所從來則曰羊與虎鬪不勝匿於隘巷獲之縣令縱之其羊有大力牛身犀蹄頭則羊也血能療創

玉面狸 東陽縣志俗名柿猫性喜食柿其肉肥美而香脂多不膩舊以充貢

竹狗鴨狗 萬厯義烏縣志毛之屬有竹狗鴨狗

薰蹄 東陽縣志俗謂火腿其實煙薰非火也淹曬
薰收如法者果勝常品以所淹之鹽必台鹽所薰
之煙必松煙氣香烈而善入製之又及時如法故
久而彌旨另一種名風蹄不用鹽漬名曰淡腿浦
江為盛本邑不多

白魚 永康縣志邑產白魚清而肥

斑魚 東陽縣志如石之斑味類琴魚乾則尤勝

神魚 成化湯溪縣志白馬潭相傳有白馬潛於水

化為巨鱖至今游魚出沒人不可捕或謂神魚

與楊

立白馬潭觀魚詩溪頭石磴坐盤桓時見修鱗
自往還可是水深魚極樂不須妄意一投竿

蟹 萬厯浦江縣志潮溪出佳蟹

紅蟹 萬厯金華府志蘭谿縣玉華峯之麓神祠前

有池方四五尺中有金色紅蟹

羅 萬厯金華府志宋貢含春羅花羅浦江元時貢

刀羅

紅邊羅 雞肋編婺州紅邊羅絲縷中細不可與無
極鹽祿等比

紬 東陽縣志絲織明淨謂之東紬織花者名花紬
綿絲織者為綿紬皆堅厚清水耐用

花布 東陽縣志匠織者謂之腰機農家自織者謂
之女機黑白相間或成五色謂之花布蠶絲間織
名梭布縲入蠶絲為兩梭紡織成文者名斜紋苧
織名苧布雜以蠶絲為魚絲皆長四丈濶二尺

紙 墨數紙取東陽魚卵虛柔滑淨者

嘉靖金華縣志梁山近盤

泉蘊有紙廠造紙東陽縣志尋常所用皮紙大者名呈文綿紙大槩皆用桑皮筍殼煮成而以藤汁

澆之萬厯浦江縣志興賢鄉出紙

藤器 東陽縣志利省藤可作大索又一種女藤構

房屋用

蚌珠 成化湯溪縣志白馬潭產蚌有珠

紫硃 萬厯金華府志蘭谿縣柱竿山多紫石如硃

可磨以寫字他山所未有也

蠟燭 東陽縣志俗以柏子油為蠟塊亦美其名耳
燭以蓬桿為心綿花裹之耐照而劣或致省下輒
另澆之便發光蓋以燈草為心故也

仙人麻 鄭東白游仙華山寶掌洞記攀援亂石有
異草如絲縷狀生峭壁上舊傳仙人麻苧之遺

白石 成化湯溪縣志白沙溪出

羊石 宣和石譜婺州金華山有石如羊蹲伏角尾
足彷彿形似高六七尺傳云黃初平叱石成之

龍石 雲林石譜婺州金華縣智者三洞洞中產石
巉巖如雪余於洞上獲一石大如拳高數寸若二
龍交尾纏繞鱗爪甲悉備石之中有數竅疑亦
鍾乳點化

五色石 武義縣志在白陽山纍纍如欲墜舊傳色
隨時換黃則歲豐儉則或青或白黃隱弗見也

涵碧石 雲林石譜婺州東陽縣有涵碧池唐令于
興宗得其勝槩鑿池面瀑布有二大石魚置沼面

魚之前有石一塊高二尺許嶮巖可觀石之半間
凹然如掌羅江東昔避地著書嘗以為研

松化石 錄異記婺州永康縣山亭中有枯松樹因

斷之誤墮水中化為石取未化者試於水隨亦化
焉其所化者枝榦及皮與松無異有未化者數段

相兼留之以旌異物焉

雲林石譜婺州永康縣松林頃因馬自然在上一夕

大風雨忽化為石仆地悉皆斷絕大者徑二三尺
尚存松節脂脉紋土人運而為坐具至有小如拳
者亦堪置

几案間

石枕琴薦

陸龜蒙二遺詩序二遺詩者何石枕材

琴薦也石者何松之所化也東陽多名山永康之地蟬聯其間中饒古松往往化而為石盤根大柯文理曲折好事者得而致於人間以為耳目之異

太山羊振文得枕材趙郡李中秀得琴薦皆茲石

也

陸龜蒙二遺詩誰從毫末見叅天又到蒼蒼化石年萬古清風吹作籟一條寒溜滴成穿聞追

金帶徒勞憶靜格朱絲更可憐幸與野人俱散誕不煩良匠更雕鐫

礎石 金華府志龍鱗山石色皆赤階礎所資

石灰 萬厯金華府志蘭谿白坑山石皆白可燔為灰

炭 東陽縣志白炭松炭栗炭皆人家所用煎銀炭舖戶買之此與各色材木並堪致遠今惟玉山鄉一二處走紹郡餘不能也

衢州府

穀 衢州府志穀類有建陽早天公早江西早俱六月熟金裏銀太平早七八月熟晚稻十月收俱謂

之米本郡無所謂團米者

萬歷龍游縣志穀之品白米六十日米秋

初早熟龍泉禾紅禾江山早太平早金裏銀俱早熟浙西謂之米價輕於晚禾食者少浙東以供

饗

糯 萬歷龍游縣志白殼糯紅殼糯鐵漿糯白芒糯

草鞋糯臘脂糯烏嘴糯俱晚熟用之釀酒有餘則

販易他縣

黍 衢州府志有赤白二種樹高粒長榦葉可代薪

土人不食淘浸磨漉為餠餌

粟 衢州府志有淮粟蘆粟皆可作酒

神仙稻 萬厯龍游縣志惟此稻旱地可藝

佛豆 衢州府志此豆種成即犁去并其莖壅水渚
之以肥田

虎斑豆 弘治衢州府志出江山縣

豆芽菜 天啟衢州府志黃卷即豆芽菜出常山

冬菜 西安縣志諸菜皆產近得一種於杭曰冬菜

瓜 弘治衢州府志開化縣出金瓜

兔頭瓜 天啟江山縣志瓜之類有兔頭瓜

瓠 天啟衢州府志大腹細頸者剝其瓠為葫蘆有

一種長身者曰芋瓠

蘿蔔 稗史彙編衢州最大味甘冬月尤美其魁如
六斗斛人家得此不敢賣戚友以鼓樂導迎至家
設酒謂之菜玉以為一歲豐亨之祥

赤蘿蔔 西安縣志小而赤者曰湖蘿蔔種自湖州
得之

薯蕷 萬厯龍游縣志邑產最多有紫白二種舊志云即山藥非也其種為蒿不及北方入藥之品

茭白 西安縣志近濠田始種頗類杭州產者諸村間有之

芋 弘治衢州府志龍游縣方山產芋大且甘異於他產

薑 天啟衢州府志薑必取隔年者名曰母薑可食其八月採者曰溫薑不可食

小筍 衢州府志以湖山為佳

冬筍 西安縣志凡竹皆有筍惟猫竹冬取者佳

岑山筍 萬厯龍游縣志岑山產竹筍焙藏最美然不多得

草 太平寰宇記衢州產號曰生子草

蕨粉 天啟衢州府志山中產蕨最廣根可作粉充

饑 龍游縣志船樓興山產蕨及葛可療民饑

松 龍游縣志楊樹山上有五粒小松數株相傳從

華山移植

桐 萬厯常山縣志有數種梧桐油桐皆結子惟白
桐花不結子其材最美可作琴瑟

槐 萬厯常山縣志有數種葉細而青者土人謂之
木槐花可作染

烏桕 萬厯常山縣志土人取其子榨油

枹櫚 萬厯常山縣志邑中多產其皮可月一取之
以為蓑衣為履套為牀薦為鞞鞋

杉 崇禎開化縣志開地田少民間惟栽杉木為生
三四十年一伐謂之拚山邑之土產杉為上薑漆
次之炭又次之合薑漆炭之利只當杉利五之一
聞諸故老當杉利盛時歲不下十萬以故戶鮮逋
賦然必仰給於徽人之拚本盈而吳下之行貨勿

滯也

開化縣志明萬曆二十六年礦稅事起有謂開化六都大興塢八都烏哨塢及四都三處

礦洞可開者時採礦曹內監委官馬忠挾諸商至縣起工先挖大興塢開兩月採礦砂四千斤約百斤烹得銀一兩不償所費於時邑令劉防範周詳奸徒斂戢及內監親臨令不激不隨調停上下然

礦利既目擊焉有又不肯空返令不得已議將雲霧山官木召拊得四百金抵充礦價內監既去礦洞仍封民不知後地方晏然仁侯之力也後三十年而有議採木雲霧之事雲霧山者先邑紳宋氏山也在二十四都界德興延袤頗廣而中阻深嘉靖間有吾氏與宋構訟吾黠甚揚言此山藪盜為不軌以聳當道而傾宋勘者至則植幟舉煙以惑之宋宦長者不與爭入山於官而訟遂息官為令每五年一焚林箐追萬厯中劉令有拊木抵礦之議土人李辛戒等納價四百拊之蓋宋氏所遺盡於此矣不知因何山名四馳奸徒垂涎天啟初有聳兩臺願自備工本採木助餉者事下本邑已而竿牆紛至皆大力者主之王令曰此非躬勘無以塞饒口遂深入其阻據實申報邑人亦始知此山之無木也乃奸徒意未已竟走京師遼大工興旁搜利孔言路遂有撫其說以聞者甚謂山方千里

木可棟明堂地可興屯吉既下浙上下愕貽利害
巨測邑巨姓及隣山居民洶洶將逃徙時但令方
下車毅然身任之亟往勘如王令言陳七不可一
不必侃侃爭之未幾巡道孫某郡守舒某覆勘知
令議不可奪遂詳巡撫疏請罷採當是時璫銳意
黃山之役以為雲霧即黃支別於是浙縉紳在京
者合疏稱雲霧屬浙與黃山了不相干得旨報罷
浙民歡呼若更生云往礦稅之使四出在處告變
有司不善調停幾至糜爛開邑幸而後先得神君
力若此雖然深山金木若有若無微奸人搆釁即
開人亦未能了然礦洞之無金雲霧之無
木也故備志始末使後來者得以考鏡焉
謹按開邑木山本為利藪然開民不能自有其山
往往貿之他郡商賈所至每因界畫不明以之啟
訟如前明伐山之事又出其變幸有良宰以息爭
端王令名家彥但令名宗臯罷採之力但令居多

特為
拈出

桃 弘治衢州府志龍游縣龍丘山三疊巖前有一

桃樹食甚甘非山中物莫知誰植

楊桃 弘治衢州府志江山縣出

石榴 西安縣志出峽口者佳衢州府志又一種白
者味酸

柿 衢州府志有一種綠柿小者曰牛乳柿

榛 弘治衢州府志江山縣出

核桃 弘治衢州府志常山縣出

落花生 衢州府志種自閩中堆沙植之花落沙上

結實如蠶

梨 天啟衢州府志出西安前塢者佳

萬厯常山縣志梨有數種

有青皮梨糖頭梨楂梨大而甘脆者雪梨可治傷寒然無真栽自諸梨苞接而成

橘 衢州府志有朱橘綠橘獅橘豆橘有漆磔紅有

金扁有撫州諸種惟朱橘大而盛行故稱衢橘

西安

縣志邑產在明時惟縣西航埠二十里上下栽橘今近城埠頭及洋村并城中隙地遍栽然數遭凍

菱其利尚不及曩時之半諸橘中惟獅橘皮厚耐寒可達京師而色味遠不逮朱橘近商販多用木桶網載得免凍皴僅有至京者近日多就園戶摘其佳者以充供奉於是朱橘盛行於京師朱彛尊篁步詩江臯有篁步地似果園坊漸遠魚蝦市真成橘柚鄉株株當暑綠顆顆入秋黃輸與村夫子經冬自在嘗

黃香橘 鄭元祐送毛彥昭歸三衢詩橘熟黃香壓

樹低

此即蜜橘

橙 天啟衢州府志出西安石塘西安縣志皮香脆

瓢酸

香緣 西安縣志黃潤有香可資清供其味稍劣

蜜羅柑 天啟衢州府志出西安石塘西安縣志香

美皮瓢皆可食

蔗 西安縣志有紫白二種紫者產龍游供咀嚼白

者種自閩中來可碾汁煉糖但土人不知以糖為

霜耳

藕 天啟衢州府志出府城內東北隅

西安縣志藕細而淡不及

杭產

芡 西安縣志芡實不及杭產遠甚以燥而枯也

梅 龍游縣志梅嶺多梅花

緋桃花 江郎山志山多緋桃華而不實

真紅桃花 名勝志江山縣浮蓋山上有仙洞有真

紅桃花而不結實

蘭 西安縣志山蘭正月雪中開春夏之交有九節

蘭亦自山中採取城市土性不宜故少種蒔惟建

蘭最貴蓋閩中氣候暄暖較西安不同難於培養

其花自五月至八月清芬相續不斷然必善為澆
灌方可歲開至閩中所重玉莖蘭西安亦未見也

萬厯龍游縣志衢郡接壤閩地
氣漸煖建蘭茉莉經冬不萎

朱蘭 天啟江山縣志花有朱蘭

仙蘭 閩部疏仙蘭於仙霞嶺得之

山鵲 衢州府志花千瓣深紅色江南人呼為浙鵲
舊志指為杜鵑其實非也杜鵑花出蜀中其花葉
俱狹而長先葉後花花單瓣硃砂紅色內一瓣有

湘妃淚紋江南人家間有之浙東無此種也

茉莉 西安縣志夏月放花性畏寒類建蘭木本者
佳邑中處處有之

桂 名勝志開化縣桂巖上有秋香一株白石罅出
婆娑掩映與巖相對峙萬厯常山縣志桂巖上有
桂樹百餘株不種自生遇秋花發風送清香數里
木芙蓉 萬厯龍游縣志大者幹如缶扶疎可愛

碧蓮 名勝志江山縣江郎山頂有池生碧蓮

青蓮菊 西安縣志菊蕪衆色培養最難有一種號
青蓮者最貴

石巖花 萬厯常山縣志狀介石竹杜鵑之間

支竹 水經注定陽縣夾岸緣溪悉生支竹及芳枳
木

方竹 弘治衢州府志開化縣出

孝義竹 弘治衢州府志江山縣出

鳳尾竹 天啟江山縣志邑產鳳尾竹

方山早茶 弘治衢州府志龍游縣方山之陽草坡

袤廣不過百餘步出早茶味絕勝可與北苑雙井

爭衡龍游縣志此茶入貢品

葉蔡游方山詩方山古剎白雲隈紫茁蒙

芽發石苔忽過道人天外至幽香移入小壺來

北山茶 西安縣志邑中出茶不多惟北山者佳

石室酒 周紫芝風流泉銘序石室酒出三衢名傾

浙右余得其法於衢人以授富水兵廚使釀之既成取以酌客無不喜者以為深醇雅健自是一種

風流因名以風流泉而為之銘

銘德惡剛暴酒欲媚斌伊何人斯釀

此秫黍觀其清醇而近道溫厚而不武則含濁醪之妙而嗣元酒之古也至於風流醞藉蓋張曲江之為人而若飲醇酎則與周公瑾而語也維彼世人喜飲酷烈太白在手轉喉耳熱謂此君子非我儔列嗟嗟我友妙韻勝絕不險以戲不陳其末誓當忘言以對玉雪

芍藥

弘治衢州府志常山縣出

石南

本草綱目葉似茜草凌冬不凋江山以南者

葉長大如枇杷葉無氣味

草犀

本草拾遺生衢婺間苗高二三尺獨莖生水

中者名水犀

枳殼 西安縣志枳殼枳實此二種即橘之未成者
春夏取之向入歲辦橘樹遭凍以來往往缺少

山茨菰 天啟衢州府志出開化入藥最良

何首烏 衢州府志舊志云龜山產佳槩言山之似
龜者耳今嵩指府治龜峰非也

龍腦葉 衢州府志山中有之與薄荷性不同借用
者誤

鍾乳花

弘治衢州府志常山縣碧玉洞有鍾乳其

乳下積如壇有花若雕題

紫荷車

衢州府志一名金絲重樓土人稱七葉一

枝花

常山草果

舊浙江通志去老痰積飲為治瘧要藥

倒生藤

名勝志開化縣錢王祖墓上至今倒生藤

蔓根皆下垂

靈草

萬厯龍游縣志野狐墩昔有異人採藥於此

相傳其上舊產靈草

紫草 萬歷常山縣志山產紫草可以染燭

馬鞭草 萬歷常山縣志草之類有馬鞭草三白草

金精草

龍鬚草 太平寰宇記龍游縣龍丘山生

白鷗 萬歷常山縣志禽有白鷗

鴛鴦 萬歷常山縣志水禽有鴛鴦

鹿 萬歷常山縣志山產雖有難致故祭恒以羊代

熊 衢州府志深山中間有之有人熊猪熊犬熊

竹鼯 西安縣志即竹豚肥美稱邑中方物之勝

石巖魚 弘治衢州府志西安縣塘臺山大乘寺有
池深不可測中有石巖魚絕大

金鯉 萬厯常山縣志紅色者謂之金鯉

白鰱 西安縣志此種魚向來西邑所產惟龍游間
一有之今歲或亦數見信乎地氣之自北而南也

石輪魚 龍游縣志鱗介之品與他邑同惟山中產

石輪魚味稍勝然亦不可多得

西安縣志又名石鱗魚深山中

極肥美方物之佳品也
府志形似蛙而大可療疴疾

白鰕 名勝志開化有白鰕池宋趙抃鎮蜀以白鰕

遺余仁合仁合放之池其後生息不絕有他蓄者
鰕色輒變遇旱水涸絕而復有

野蜂 萬厯常山縣志蜜巖半崖其石下窪多野蜂

刮蜜

細 常山縣志絲粗而寡間有織為開化細鷺毛素

欽定四庫全書

浙江通志
卷一百六

者

麻布 常山縣志績青麻為之若黃麻只可絞索

紙 常山縣志大小厚薄名色甚衆曰歷日紙贓罰

紙科舉紙冊紙三色紙大紗窗大白榜大中夾又

曰十九色紙白榜白中夾大開化小開化白綿連

三結實連三白連七白綿連四結實連四竹連七

竹奏本白楮皮小綿紙毛邊中夾白呈文青奏本

又間一用之曰玉版紙簾大料細尤難抄造他若

客商所用各隨販賣處所宜名色不可枚舉凡江南河南等處贓罰及湖廣福建大派官紙俱來本

縣買納

衢州府志藤紙綿紙竹紙三種並皆細品裁園雜記衢之常山開化等縣以造紙為

業其法採楮皮蒸過石灰浸三宿揉去灰又浸水七日春爛漂入胡桃藤等藤以竹簾承之俟其凝結撇置磚板以火乾之

燒紙 萬厯龍游縣志貨品中惟多燒紙勝於別縣

西安縣志邑之紙以草雜竹絲為之色黃粗糙止供楮幣及包裹之用不中書也出南北山上方上諸處

松煙 墨經古用松煙墨衢州柯山皆產松之所柯

山品下

癸辛雜識三衢葉茂實造軟煙法近水作暖閣高足其上以紙罩地為帳高七八尺

於閣下用碗數十貯油炷燈閉之密室油氣透頂與他煤絕異膠法甚奇中用紫礬當歸秦朮腦麝畫燕支沒石子之類蓋取其活膠而不滿也故經久而色光不少渝

金星硯 萬厯常山縣志硯山出金星石可為硯四

方人多貿易

玉帶硯 常山縣志有紫石有黑石紫石中有白一

條其名曰紫袍玉帶頗貴重然不可得矣

草席 常山縣志邑產草席

棕薦 常山縣志邑產棕薦及棕套

竹器 萬厯龍游縣志南山多猫竹土人用以製器

茶籠 雞肋編開化山僻人魯而製茶籠鐵鎖亦佳

鎖 常山縣志銅鎖鐵鎖本邑製造

涼鞞 常山縣志土人用棕或席草製

漆 西安縣志出南山湖南嶺頭諸處常山縣志十

九都有之

黃蠟柿漆 龍游縣志貨之品有黃蠟柿漆

蠟燭 常山縣志邑產白蠟造為燭堅凝可當風

銅 天啟衢州府志銅山在西安縣西舊經云是山

出銅常山縣志礦出銅山礦坑蓋跨西遂德常四
縣之境先年開礦者礦百觔煎銀三十兩或二十

兩後止四五兩脉且盡矣其煎取之法有明爐而

又有罐爐作用亦自不同

西安縣志銅山在縣西北百里宋時出銅鉛錫

今出礦前此徽處二州人羣聚取礦推官劉起宗
逐散迄已未春復聚至萬數構爐成市猖獗甚守

楊準患之與同知薛應元通判張澤推官任秀謀
議協一具請於監司可之乃調所屬五邑兵閱於
教場凡七日先期移檄諭以干犯禁令散歸從事
本業去者不追遣官守衛通衢開其歸路地方毋
得乘機殺奪時有感悟而散者中宵火其廬死者
千數公甚矜之其頑梗拒命者出師絕其油糧分
道進礦徒畏懼修詞服罪潰散不遺一矢旬日班
師其後礦徒復聚又行委西安縣知縣俞大有集
兵逐散之大抵利之所在民爭趨之散而復合理
之必然若非防維芟難處置得宜鮮不至於蔓延
滋害流毒地方司民牧者其尚加之意云邑令陳
鵬年銅山辨按此山即今所謂銀坑是也銅山則
別有一源本名桐山亦非銅也其音地之所以訛
者意由初開礦日淘沙挖礦之徒恐干禁網假此
名以欺飾觀聽耳明時自世宗至神宗礦廠幾遍
天下銀坑盜起蹂躪數邑而西安被害尤甚相傳

欽定四庫全書

卷一百六

威大將軍親率兵定之。因於衢州設兵備道。置守戍兵千人。衛之有兵自礦盜始。自萬曆三十二年詔停採礦。大吏徵行於銀坑四路。皆立碑永禁。設防禦甚嚴。今諸碑具在。夫開採之害。其起自公家者。則中貴人主之爐頭。僉侵噬之。因以恣睢暴虐。延害生民。固已若乃不隸公家。而私自採取。則主之者必地方之巨奸。附之者皆異鄉之匪類。其為禍更有不可勝言者。何則。所謂奸民匪類者。率皆窮困不能自振之徒。竭其智巧。機詐無所得財。徒欲邀倖於此。而甘心焉。其心固已不可測矣。而父老皆言。此礦年久。墮道阻塞。礦脉細微。尚不足以充稅額。一旦舉事。而工費不繼。心力不一。有所得則必爭。無所得則必散。此輩皆一時烏合。無能統領。而控馭之者。爭則非刑法之所能平。散則非芟蕪之所能盡。以致蔓延潰決。釀為大患。若僅作奸以蹈法。負稅以累官。又直其害之微焉者也。

花石 名勝志常山縣金川溪中花石如疊

常山石 宣和石譜常山縣思溪又地名石洪或云

崆石出水底側垂如鍾乳雜沙泥不相聯接採人

車戽深水甚難得之或大或小不踰數尺奇巧萬

狀多是全質一石則有聯續共銑十數峰高下峭

拔嵌空全若大山氣勢亦有如拳大者有於巉巖

嶮怪巖竇中出石筍或欹斜纖細互相撐柱之勢

蓋石生溪中為風水衝激融結而成奇巧又有峰

巒聳秀洞穴委曲相通底坐透空勘施香燼若煙
雲縈遶亂峰間一種色深青石理如刷絲捫之輒
隱手又一種青而滑或以磁末刷治而然率皆溫
潤扣之有聲間有質樸全無巧勢此石性稍礪不
容人為非靈壁可增嶮怪

開化石 宣和石譜開化縣龍山深土中出石磊塊
或巉巖可觀色稍燥扣之有聲又地鼃灘亦多產
石水中色稍青潤石質骨麤而肉細率皆全質間

有羣峰前後羅列若大山氣勢比之思溪無峭崿
勢扣之亦有聲

錦川石 萬厯常山縣志石形如山條分縷析各成
拱把或三四尺有至一二丈者膚紋粲然有若錦

繡詹濟錦川石詩條條石筍短長眠脉絡分明瘦
且堅人力不須施巧琢天工自爾閩鮮妍四圍
看似身穿錦三品齋如字寫川誰
道古根移不動也應遶索置平泉

煤 西安縣志明時人家皆用炊爨今人不復採鬻
民間亦不復用然西山南山皆有之

土炭 西安縣志九仙巖有屋空架石上屋下細土
以旋風搏掬皆成球破之中有細炭可以療疾

嚴州府

穀 嚴陵志杭有早稻晚稻紅稻白稻糯有秋糯晚
糯粟有杭粟糯粟麥有大麥小麥蕎麥麻有黃麻

白麻豆有黃豆綠豆青豆黑豆蠶豆

桐廬縣志洋
洲周回十五

里其陸地宜
麻粟菽麥

麵 方回次韻張耕道詩麵灘船欲澁茗務井還深

自注睦有近城灘民以船載磨治麵城中茶場大井汲者衆故有麵灘船茗務井之句

豆 桐廬縣志豆有田豆佛豆虎爪虎斑貓兒蜂兒諸名品不一

羊角豆 方回治圃雜詩豆莢惡肥田自注羊角諸豆必瘦地乃結

烏稗 嚴陵志建德縣黃饒村產烏稗絕佳甲於州境

烏麻

嘉靖浙江通志其子名巨勝更有黃白黑三

種

蔞菜

嘉靖浙江通志嚴州蔞菜俗名山芥菜

齊民要術

蔞菜
味辛

蔓菁

萬歷遂安縣志花果山古有僧化身於此居

者不種蔬但焚其地而鋤之蔓菁之類自出

茄方回治圃雜詩茄藤宜硬地自注茄須於硬地

穴以種

綠蔥根 海瑞濟饑草木氣臭須換水浸洗七十二

次不然有毒

松花蕊 海瑞濟饑草木松花時取其蕊用飲湯調
食經久不饑和米麥麵蒸食亦可濟饑

蕨粉 海瑞濟饑草木蕨根洗淨搗碎用水澄粉自
九月至三月粉多四月初抽青粉少蕨食嫩莖可
濟饑

葛粉 海瑞濟饑草木搗碎用水洗出澄粉其味勝

蕨

擇子

海瑞濟饑草木曬乾去殼成粉作腐

筍扭根

海瑞濟饑草木曬乾搗碎成粉煮食可濟

饑

野苧根

海瑞濟饑草木去皮搗碎成粉可濟饑

苦株子

海瑞濟饑草木可炒食作腐味佳

仙遺粉

海瑞濟饑草木俗名冷飯塊煮成粉可食

榔樹根

海瑞濟饑草木其皮根熏燥研末成餅可

食

山苦蕒 海瑞濟饑草木山苦蕒及苦益菜皆可食

布谷柴子 海瑞濟饑草木舂成餅煮粥

老鴉饅頭 海瑞濟饑草木搗碎和水用絹濾汁成

腐

菜筍 桐廬縣志明代歲辦菜筍

桐 太平寰宇記桐溪有大猗桐樹垂條偃蓋蔭蔽
數畝遠望似廬嚴州府志淳安縣桐橋側舊有大

桐木故以名橋

柳 弘治嚴州府志朱暄知府事富春驛舊路夾植
以柳相望數里

梓 萬歷嚴州府志遂安雲濛山與梓樹塢相屬

楓 萬歷嚴州府志建德縣楓樹嶺上多楓壽昌縣
萬松山松楓蒼翠掩映通達

空心木 名勝志淳安縣仙居洞其近山木多空心
石榴 桐廬縣志出孝仁水濱二鄉實甚大舊貢天

順中寒甚樹多枯者自此免貢

金鈴 嘉靖淳安縣志苦楝子名

蜜栗子 物類相感志出青溪山中形如蚌內有金星外堅如栗色亦如之可食味甘能制五金

橘 梅堯臣送余少卿知睦州詩種橘收包小雪前
仙橘 花史嚴州府城南有橘山陰峻不易登上有
羅浮橘一株熟時風飄墮地得者傳為仙橘

蔗 萬厯嚴州府志淳安縣蔗山昔人於此種蔗

罌粟 方回治圃雜詩花有如罌粟能同橘不遷自
注罌粟移即不活

桂 萬歷嚴州府志淳安縣百桂峰綿亘雄峙香桂
叢生環水王氏世居焉萬歷壽昌縣志平巖石上
桂樹壁立秋香遠播

巨勝 葉養蒙題過浴洞詩羣羊吃盡巨勝花不遇

初平化為石

洞在壽昌
縣過浴山

鷺鷥菊 百菊集譜嚴州多菊此品最貴花如茸毛

純白色中心有一叢簇起如鷺鷥頭

雙竹 新定續志淳安縣雙玉里以里產雙竹因名
越王竹 北戶錄嚴州產狀若荻枝高尺餘可代酒
籌

箬 嚴陵志閭仙洞產箬即郭文採箬之處

鳩坑茶 埤雅早取曰茶晚取曰茗又名曰糲有睦

州之鳩坑

嚴陵志淳安縣鳩坑產茶以鳩坑源水
蒸之香味加倍茶經載桐君藥錄謂西

楊武昌廬江晉陵好茗而不及桐廬又謂凡可飲
之物茗取其葉天門冬取子拔萸取根而羽叙茶

所出謂浙西以湖州上常州次睦州下生桐廬山谷與衡州同按唐志睦州貢鳩坑茶屬今淳安縣宋朝既罷貢後茶亦不甚稱范仲淹鳩坑茶詩瀟瀟桐廬郡春山半是茶輕雷何好事驚起雨前芽

分水茶 六研齋筆記分水縣天尊巖產茶最芳辣

宋時以充貢

紫桃軒雜綴分水貢茶出本不多大葉老根發之不動入水煎成翻有奇

味

芽茶 桐廬縣志明貢芽茶

酒 六研齋筆記桐廬酒味清美名灑落泉乃嚴瀨

水所釀

釀泉酒 新定續志郡城軍門內曰釀泉今連筒入

公庫資歲釀

刺虎 圖經本草生睦州凌冬不凋采根葉枝入藥
味甘治一切腫痛風疾

草龍膽 嘉靖浙江通志嚴州草龍膽性苦似膽

石乳 嚴陵志淳安縣洞深可數里泉溜凝結如乳
又桐廬縣閬仙洞石乳滴溜不竭

蓮花乳 萬歷嚴州府志分水縣揚山洞崖上乳滴

如羅漢像如蓮花

乳香 建德縣志乳香巖相傳有乳香下垂故名

白石英 元和郡縣志遂安縣白石山出白石英

杜若 建德圖經嚴陵山水稱號率有經據如杜若

汀洲見於杜紫薇詩杜若芳洲翠

子規 汪廣洋過三百六十灘詩催歸不待臨歧語

夜夜子規啼到明

翠鵲 名勝志桐廬縣綰仙洞內有翠鵲

畫眉 張翥浮山道中詩一溪春水浮黃頰滿樹暄

風叫畫眉

碧鷄 嚴陵志桐廬縣垂雲洞有禽曰碧鷄其大如

鵲色如翡翠聲如吹笙仰石以棲每歲一至哺雛

而去

黃裳碧鷄詩翠碧笙簧與羽聲有時離合不留情清多本是仙家物長向秋風獨自鳴

鴉舅 胡宿釣臺詩五更鴉舅最先啼

烏雌 桐廬縣志舊額貢野味有烏雌

雨燕 名勝志壽昌縣岑山之北為燕山每遇亢旱

羣燕翔集即雨

羊 嚴陵志趙抃知睦州睦地多羊歲為杭市抃為

文却之

仙鼠 徐誼洞巖寺靈栖泉詩洞中仙鼠大如鷄

黃魚 嚴陵志桐廬縣九里臨大江居民駕巨舟泛

海捕黃魚至一月二三次往杭貨賣其時鮮號曰

小杭州

鱸魚 李郢過桐廬詩鱸魚鮮美稱蓴羹許渾釣臺

詩嚴陵臺下桐江水解釣鱸魚有幾人

赤耍魚 舒岳祥溪魚詩注此魚俗名赤耍日間見

人則驚奔深入石下至夜則駢首沙際人以火照

投刀中之即可掩漉也

桐廬縣志溪有赤耍魚

神魚 萬厯嚴州府志遂安靈巖山深潭百丈中有

神魚出沒

金色鯉 分水縣志邑東龍潭中有金色鯉魚

魚鮓 李頻過魏馱山詩石斑魚鮓香衝鼻

山在壽昌縣西

魚苗避暑錄話浙東嚴灘溪大峻急多灘石魚隨水觸石皆死故有溪無魚土人率以陂塘養魚乘春魚初生時取種於江外長不過半寸以木桶置水中細切草為食謂之魚苗投於陂塘不三年長可盈尺但水不廣魚勞而瘠不能如江湖間美也山蠶李旻嚴州府修路記土不產米民僅以山蠶而入帛較之浙右諸郡其等為最下

蟾蜍嚴陵志桐廬縣垂雲洞中有大蟾蜍夜寂月

明則出

蛙 萬厯嚴州府志桐廬學宮前舊有蛙聲有異人
朱書符篆於瓦投池中竟不產蛙地傍四面則蛙
聲聒耳矣

野蜂 名勝志淳安縣仙居洞石隙中多野蜂往往
出窰弘治嚴州府志壽昌縣蜜山怪石崔巍中有
石窟蜜蜂居之

絹 方回建德府節要圖經序皇祐間歲為婺州輸

絹三萬六千匹婺歲歸本郡米一萬五千石戶部督絹本郡以上征下歲無虧額本郡督婺州米列

郡勢相侔負固不償而郡愈不可為矣

嚴陵志景定二年戶

部申照得嚴州代婺州解絹以充上供婺州外撥米還嚴州充軍糧其來非一日矣邇年兩郡互有申請其曲不在嚴而在婺蓋嚴代婺解絹乃承戶部拘催不可稽違婺還嚴之米既無統攝率是違次甚至開慶年間尚欠二萬餘石宜乎嚴之有請於朝欲將代解之絹從本州折價糴米徑令婺自解絹準省札行下許令嚴州於代解絹內截留一半計一萬八千疋自市米以充軍食仍以一半絹解赴戶部亦令婺州解絹一萬八千疋補足戶部元額却與免撥米還嚴州自景定元年始續婺州

乞解絹解米各仍舊貫本部又以節次備申續準
行下若婺州欲仍舊貫今項預辦一年之米一萬
五千石發還嚴州方可從申續又據婺州申已椿
到米一萬石還嚴州今嚴州又申每歲差撥人船
取米每被坐困乞照近降指揮監婺州解絹容本
州自措辦軍糧及謂婺州所報見有米一萬石以
待本州取發者平時率是虛紿以脫本州先次解
絹本部令與酌可行之說為悠久之計嚴州解本
部之絹不患其不足婺州還嚴州之米欲催嚴州
之絹當先催婺州之米州郡一也體統一也豈可
謂本部可催嚴州之絹而不為嚴州催婺州之米
乎況嚴州申請不已者止以婺州之米不還米苟
還矣其將何辭所有景定元年互撥米絹嚴州已
將合解一半之絹折價糴米以充軍糧况隔一載
難於再理當令婺州將合還嚴州景定元年米一
萬八千石每石照司農寺折價解部買絹補還元

額專官前征守待起發所有景定二年以後年分其婺州還米一萬五千石嚴州解絹一萬八千疋各分作三綱須管婺州先自起發本色米斛至嚴州交管同嚴州絹綱申發赴部第一綱十一月下旬第二綱十二月下旬第三綱次年正月下旬婺米之交管嚴絹之起綱定在如期同時到部仍委各州僉判任責自今後各郡僉判批考及離任須管具本年各處發米發絹數目月日申部點對乞劄下嚴婺兩郡遵守施行候指揮照得嚴婺州兩易絹米昨降指揮已自平允今兩郡折申不已區畫悠久之說來上理亦可行仍令各郡正任通判任責催發不許違戾

交梭布 太平寰宇記睦州產

苧布 嚴陵志舊貢竹簟十領南渡後貢白苧布十

足以折簞

絲綿 萬厯桐廬縣志田多瘠薄其地宜桑而產絲
綿

厯日紙 桐廬縣志明代歲辦厯日紙黃白二色

墨煤草紙 桐廬縣志貨產墨煤草紙

筆 萬厯嚴州府志皇甫松大隱賦云書抽虎僕博
物志載有獸緣木文似豹名虎僕毛可以為筆今
土人名九節狸試之甚佳

木竹杖 避暑錄話淳安木竹杖六節密而內實畧如天壇藤間有突起如鶴膝者非峭勁敵風霜不能爾也

槐花 萬厯桐廬縣志宋時辦顏料槐花烏梅梔子

黃漆 明一統志淳安遂安壽昌三縣出漆

本草綱目浙東

出一種漆樹似小榎而大六月取汁漆物黃澤如金即唐書所謂黃漆也

桐油 明一統志淳安壽昌二縣出桐油

白蠟 萬厯嚴州府志睦地產白蠟最行遠

本草綱目吳越

東南諸郡皆有之蠟樹枝葉狀類冬青四時不凋五月開白花成叢結實累累其蟲大如蟣蟲芒種後延緣樹枝食汁吐涎粘於嫩莖化為白脂乃結成蠟狀如凝霜處暑後則剥取謂之蠟渣若過白露即粘住難剖矣其渣煉化濾淨或甑中蒸化瀝下器中待凝成塊即為蠟也

銅 晏公類要睦州有銅官山唐時於此置官採銅

嚴陵志建德遂安縣皆產銅

何夢桂建德路罷金課記元跨有東南初

榷金課蓋履山澤之所產而斂取焉睦為古揚州分荆揚貢金在禹貢不廢睦萬岫千峰二江十八瀨意亦瑤錫鉞銑之所生也然考古圖志金非其土產如瑤琨齒貝皆產於揚而睦亡是睦為州最僻陋其土產之數固亦不得與他壤齒考秦漢而下治山鑄海之利載之史志然自銅錫鉛鐵之外

無聞焉唐有陝西暨宣潤等州歲銀而已近代固
常徵陝與宣饒歙撫南安諸州金尋亦中廢試數
其地其隸於揚者惟饒歙撫南安四州耳而睦不
與數茲豈天產而地歲之睦固不能化無以為有
也至元己丑始籍六邑民為金戶民初見且駭方
俛首就事官授之方督具器物使之披砂抉石而
汰焉民喜殆謂天雨之也初歲租給再歲而虧三
歲而竭其故何哉蓋睦居歙下流春夏潦漲歙之
江潰揚濤吹沙澎湃而下故金之瑣屑如糠粃者
遇洄洑而伏焉為洲壘焉為嶼民日爬撻於此所
得蓋鎔銖而已抑不知幾千百年之所積猶不能
以供旦夕之所採取欲久而弗窮得乎況遠鄉下
邑距江逾絕民棄家輟業裹糧以從畚鍤未至而
力已困其所司又重之以培剋撻剝羈繼笞捶故
上下二三年間貧戶不足於償而逮及隣比親姻
者比比也郡侯為民疾苦無所於愬上之江浙等

處行尚書省省閒於朝省官阿喇卜丹平章入覲
條奏金課特罷建德一路今年二月旨下省檄諸
管民官詳究奉行本府總管朝列管侯承命與府
長貳率其屬進其民而告之曰是公朝之至恩而
省府公之嘉惠也民父老感激歡舞則又曰徵我
侯不及此今而後得釋此以耕鑿飲食作息而免
於患者德至厚也願鑱石以誌不朽雖然茲固幸
吾一路之私也天地生物止有此數窮人力以取
之木有不受其槁者世有觀民風
者推而放之以幸東南庶乎其可
謹按嚴州郡邑諸志俱不詳物產僅列一目而已
茲博徵羣書兼採篇什以見一物雖微皆切民用
而徵絹罷金二事尤關
政事之大者故加詳焉

鐵
新定續志建德縣五山共一源曰金山相傳石

上有金牛足趾曰銀山銅山綠山鐵山皆以地所
產得名宋惟鐵山尚資冶課餘皆礦竭坑存

錦石 嚴陵志淳安縣錦沙村林木森聳波流澄澈

映石如錦寰宇記云錦石舒文

雲麓漫抄自浙江東南溪行溪水淺

澀湍急深五七寸碎石作底小者如彈
大者不過盈掬齒齒無數五色可愛

青碧石 萬厯嚴州府志淳安縣龜鶴二山兩峯相

值其山昔產青碧堅石

薪方回建德府節要圖經序物產之宜萬山叢蔽


山居八田居二往往樵薪為生萬厯遂安縣志五
都民無重資而負薪為業

炭 桐廬縣志白雲源林麓茂盛鄉民採薪為炭數

州烝爨之用皆取給焉

老學菴筆記高宗詔嚴州進炭止用土產不用琴樣

胡桃文
鵝鵠青



浙江通志卷一百六

欽定四庫全書

史部

浙江通志卷一百七十九

詳校官給事中臣戴璐

檢討臣德生覆勘

總校官編修臣倉聖脉

校對官監丞臣張曾炳

謄錄監生臣張恒

欽定四庫全書

浙江通志卷一百七

物產

七

溫州府

穀 瑞安縣志福全山頂陶隱居嘗種白穀於此色

如玉因名其地為種玉畦

穀譜瑞安有磊晚無芒與他穀異

稻 溫州府志溫州多美稻其稻類有白散地暴水

稜占城軟孕稻百箭白西龍興磊晚早糯紅羅障

金裏銀金水糯青糯

穀譜浙江溫州稻歲兩熟

麥

溫州府志有大麥小麥蕎麥米麥光頭麥

豆

溫州府志有黑豆白豆六月烏綠豆白扁豆赤

豆蠶豆豌豆八月白雲豆寒豆紫豆刀豆三收豆

珍珠豆

芝蔴

溫州府志亦名脂麻溫產最佳

苕蓬菜

隆慶樂清縣志一名甜菜食甚甘其莖和

灰汁可澣衣

瓜 瑞安縣志有數種有從小甜有揺棚落惟瓜籃
味尤美

芋 温州府志有兒芋山芋麪芋紫芋又有水旱二
種

蹲鴟 李孝光雁山記鴈山土膏肥種蹲鴟大如斗

芋屬

薯蕷 雁山志有紅白二色產於巖石竹樹間者味

清而甘堪入藥圃種者味佳不堪入藥

温州府志
圃種極大

者重可四五斤出

巖石者名山薯蕷

筍隋筍 筍譜自甌越以南七月生至八月盡

龍芽筍 筍譜出永嘉大羅山長四五尺稀節人取

必有大風雨雷電人下山則止其筍春二月生

蓴 萬厯温州府志樂清蓴湖產蓴

王十朋蓴湖詩
水晶綠線滿湖

中遙與吳江氣味同我輩他
年罷游官思歸應不待秋風

草 山蔬譜永嘉人以霉月斷樹置深林中密斫之

蒸成菌

俗名香菇有冬春
二種冬菇尤佳

山粉 萬厯温州府志春蕨根舂為粉俗名山粉出

泰順

百合 雁山志根可食一名鬼蒜荒年山中人取以療饑

石髮菜 嘉靖浙江通志温州產石髮菜亦名海藻
苔菜 萬厯温州府志鹿角苔菜生海巖

松 王十朋巖松記有以巖松至梅溪異質叢根柏
葉檜身而得松氣象焉亦草木之英奇者

五粒松 萬歷溫州府志永嘉華蓋山麓有松五粒

倒生松 溫州府志巽山丹崖有倒生松

王應辰詠倒生松詩

世間有松皆直幹夭矯修條拂層漢此種何年分
偃佺游龍倒挂丹崖前垂陰落落華蓋偃翠黛離
離塵尾駢風微亦解奏絲竹雨過渾如澤膏沫初
疑滅跡同隱仙乍見翻身似鸞鷁五株不用比秦
封一粒真堪生大谷須信棲根良得宜歲寒千
載常環竒即教盤錯有如此本性凌霜何必知

榕 瑞安縣志邵公嶼有榕樹盤鬱其上清蔭數畝

樟 萬歷溫州府志樹大堪為船

檜 萬歷溫州府志有香檜垂檜

杉 萬歷温州府志有刺杉細杉瑞杉

檟 萬歷温州府志實可食其木可為宮室

櫨 嘉靖浙江通志温州櫨木置箱櫃器物輕而利

用 温州府志其木堅而香

椅桐 永嘉縣志吹臺山產椅桐梁太守丘遲嘗採

以製琴

丁冬 萬歷温州府志即頽桐俗名丁冬

樺桃 萬歷温州府志其皮土人用以為燭

烏柏 萬歷温州府志實如雞豆液可為燭

松蘿木 王十朋松蘿巖詩注樂清松蘿巖上產

萬年春 永嘉縣志木有萬年春

藤 平陽縣志平陽白雲山有深澗道絕不通有巨

藤盤繞其上行人援之以進是曰藤道

梅 温州府志平陽梅溪古稱梅源

鴛鴦梅 嘉靖浙江通志温州有鴛鴦梅

杏 萬歷温州府志圓曰金杏扁而青者曰木杏

梨 永嘉郡記青田村人家多種梨名曰官梨子大一圍五寸恒以供獻名為御梨吏司守視土人有未知味者其實落地即融汁

溫柑 橘錄真柑在品類中最貴可珍其柯木與花實皆異始霜之旦園丁採以獻風味照座北人有未之識者一見而知其為真柑矣一名乳柑謂其味之似乳酪溫四邑之柑推泥山為最南塘之柑

比年尤盛

全芳備祖柑者橘之屬橘出溫郡然多種柑韓彥直著錄其別種有八曰真曰

生枝曰海紅曰洞庭曰朱曰金曰木曰甜而乳柑
推第一故溫人謂乳柑為真柑橘亦出蘇州台州
閩廣皆木橘耳不敢與溫州齒敢與真柑爭高下
耶且溫四邑俱種柑而出泥山者又傑泥山盡平
陽一孤嶼延袤只三三二里許無連岡陰壑非有風
氣之浸淫出三三二里外香味益遠不連或曰溫並
海地斥鹵宜橘與柑而泥山特斥鹵佳處故獨與
他異予謂不然夫姑蘇丹丘七閩兩廣往往多並
海何獨溫而又豈無二三里得斥鹵佳處如泥山
者自屈原司馬遷張衡潘岳王羲之謝惠連韋應
物輩皆言吳楚間出者而未嘗及溫溫最晚出而
羣橘盡廢物之變化出沒其浩不可考如此羣芳
譜柑出泥山為最其味似乳酥故名其木婆娑其
葉纖長其花香韻其實圓正其膚理如澤蠟其大
六七寸其皮薄而味珍腴不黏瓣食不留滓一顆
僅二三核亦有全無者擘之香霧噴人為柑中絕

品雲麓漫抄永嘉人呼柑之大而可留過歲者曰海紅按古今注柑實形如石榴者謂之壺柑蘇轍毛君惠溫柑詩楚山黃橘彈丸小未識洞庭三寸柑不有風流吳越客誰令千里送江南

獅子柑 瑞安縣志俗名皺柑與乳柑不同

佛手柑 永嘉縣志柑類不一有佛手柑 陳邦屏詠佛手柑詩

玉液分仙品金衣借佛尊掌擎承露瓣爪破落霜痕色未空諸相香猶滯六根洞庭曾作釀獨種給

孤園

朱欒 游宦紀聞永嘉之柑有一種名朱欒花似橘其香絕勝乃好柑之祖栽接之法取朱欒核洗淨

下肥土中一年而長名曰柑澹其根簇簇然明年移而踈之又一年木始大盈握遇春則取柑之佳品或橘之美者接於木身則盡為佳者矣朱欒乃

枳也

萬厯温州府志朱欒多刺花如蓮子掇其英以燕沉速二香芬馥清冽全芳備祖橙類別

種有五曰橙曰朱欒曰香欒曰香櫟曰枸橘

蜜櫟 萬厯温州府志永嘉有蜜櫟

橘 橘錄產於溫者其種十四曰黃橘塌橘包橘綿橘沙橘荔枝橘軟條穿橘油橘綠橘乳橘金橘自

然橘早黃橘凍橘

甌江逸志永嘉之土宜樹橘韓守彥直之譜足徵宋世產於西

山葉正則詩云有林皆橘樹無水不荷花是也厥後盛於隔江之河田而上岡而南仙洋漸至於吳田地氣之遷徙昔西北而今東南矣按東嘉之橘與浙西之蜜橘相似其味甘美以無核者為上廣興記所云乳橘即此也羣芳譜橘出蘇州台州西出荊州南出閩廣撫州皆不如溫州為上葉適橘枝詞蜜滿房中金作皮人家短日挂疎籬判霜剪露裝船去不唱楊枝唱橘枝

金豆 甌江逸志柑之小者曰金豆獨名羅浮者或

產於江北之羅浮其品最佳故以地名之溫人去

核浸以白糖入口香美點茶絕勝

葡萄 隆慶樂清縣志味最甘

瓜 本草綱目永嘉有寒瓜甚大可藏至春即西瓜也則五代之前瓜種已入浙東但無西瓜名耳

蓮 溫州府志永寧門外雙蓮橋產蓮花並蒂

午時蓮 萬厯溫州府志花白而小非午則合

菱 隆慶樂清縣志菱三角其色有紅有綠

海棠 萬厯溫州府志紅色以木瓜頭接之則白有

黃海棠又垂絲海棠花淡紅以櫻桃接

丁香 隆慶樂清縣志花色有紫白有金絲葉

杜鵑 雁山志有四種緋紅粉紅藍色碧色隨處有

之惟雁山書院左右最盛碧者亦難多見

萬應溫州府志

有川鵑自川來者王十朋杜鵑巖詩注樂清杜鵑巖在戲綵巖之東頂平上多杜鵑花故以花名巖

一名巖笑花

四季杜鵑 稗史彙編王順伯為平陽尉嘗以九月

詣村墅道間見杜鵑花一本甚高花正開幾數千

朶色如渥丹照映人面皆頰訝其非時詢之土氓

皆云此種只出此山谷中一歲四番開春秋為盛
順伯欲訪求小者竟不可得云

木芙蓉 花史温州江心寺文丞相祠中有木芙蓉
盛開其本高二丈幹圍四尺花幾萬餘暢茂散漫

有紅白變色者名醉芙蓉

甌江逸志温州芙蓉高與梧桐等八月杪即放

花九月特盛遍地有之登樓一望但見紅霞燦爛
亦奇觀也最妙者名醉芙蓉晨起白色午後淡紅
晚則變為深紅其樹宛若梧桐殊堪
玩賞甌江又名芙蓉江者蓋謂此也

蘭 隆慶樂清縣志一莖一花濃者為甌蘭

甌江逸志温州

蘭有四季又有秋蘭皆不可多得惟夏蘭家家有之不以爲珍

挂蘭 草花譜產溫台中巖壑深處懸根而生人

取之以竹爲絡挂之樹底不土而生花微黃肖蘭

而細不可缺水時當取下浸濕又挂亦奇種也

羣芳

譜風蘭幹短勁花黃白取大窠者盛以竹籃或束以婦人頭髻銅鐵絲頭髮觀之縣於不見日處朝夕曬以冷茶清水或時取下水中浸濕又挂至春底自花即不開花而隨風飄揚冬夏長青可稱仙草最怕烟燼一云此蘭能催生將產挂房中最妙

茉莉 甌江逸志溫州地氣和暖故茉莉最盛冬間

置簷下不畏風不須遮護逢春發葉甚茂有高一

二丈者開花無算其小者亦丈許花亦不可勝計

簇蝶 酉陽雜俎簇蝶花花為朶共簇一葉葉如蓮

房色如退紅出温州

雲麓漫抄衛公草木記云有永嘉之簇蝶今此花來於浙

東四布如蝶中有攢葉晏元獻云疑是簇蝶也公
有玉蝴蝶詩注此於下蘇子由有萬蝴蝶詩云誰
唱殘春蝶戀花一團粉翅壓枝斜美人懶向釵頭
插猶恐驚飛避鸞鵲則知簇蝶萬蝴蝶即今之玉

蝴蝶也

山礬 萬厯温州府志極香木高數尺土人以其葉

鮓鮓

洛陽 萬歷温州府志一花五色俱備纖膩可愛

金沙 温州府志郡圃中有金沙花

王十朋種金沙花戲呈景盧詩

春光駘蕩楚天涯李白桃紅次第花未向名園看鐵樹聊於郡圃種金沙

扶桑諸花 永嘉縣志溫地暖多奇花有扶桑玉甌

美人蕉占紅羅佛瓜紫燕五段錦鶯花水枝花溫

州府志有紫梅花

簞竹 隆慶樂清縣志促節肉厚可為弩

天中記竹之良者惟

欽定四庫全書

卷一百七

有篁竹謝靈運所游之澗今在雁蕩其自乾筍謂之仙人杖靈運游名山志云神子溪南山與七里山分流去斤竹澗數里有從斤竹澗越嶺溪行詩此云篁竹似誤

蒯竹 輿地志平陽仙壇有蒯竹風來成韻自成宮

徵石上常淨了無塵籜

篠竹 筍譜出溫處如苦竹長節而薄可作屋椽

蘆竹 竹譜有竹象蘆因以為名東甌諸郡緣海所生肌理勻淨筠色潤貞凡今之簾匪茲不鳴

淡竹 隆慶樂清縣志可造紙及取漚

方竹 雁山志體小而方可作杖用山中人每取其
枯瘦有棱節者刻其根為人物以贈人

石竹 萬厯温州府志夏生筍味甘可為紙

桂竹 隆慶樂清縣志火燒其汁可以散痰

苦竹 隆慶樂清縣志可為槍用以殺虎

觀音竹 雁山志莖小葉細長不滿三四尺人家多

植園圃中石上蒼翠經冬不凋

江南竹 瑞安縣志春筍節長

茶 萬厯温州府志五縣俱有樂清雁山龍湫背者

為上瑞安胡嶺平陽蔡家山產者亦佳

雨航雜錄
雁山五珍

謂雁山茶與觀音竹金星草山藥官香魚也雁山志浙東多茶品而雁山者稱最每春清明日採摘茶芽進貢一槍一旗而白色者名曰明茶穀雨日採者名曰雨茶此上品也又一種紫茶香味尤佳難種薄收土人厭人求索園圃中少植間有之亦必為識者取去甌江逸志按茶經云温州無好茶惟雁山水為佳此山茶亦為第一日去腥膩除煩愜却昏散消積食但以錫瓶貯者得清香味同陽羨山芥茶無二採摘宜近夏不宜早炒做宜熟不宜生如法可貯二三年愈佳何白龍湫頂新茶歌雁頂東南天一柱上有天池宿雷雨夜半光飛一線霞海色金銀日初吐仙茶盤植於其巔雪鬢霜

饗枝幹古石根
融液鎖萬峯
灑性高寒味清苦
山僧軍持汲白
泉活火新烹香撥乳
玉華甫插香氣通
一洗人間
幾塵土粉槍朱旗殊失真
鳳餅龍團何足數
白茅
珍品說洪州
紫筍佳名傳
顧渚寧知此地種
更奇
僻遠未登鴻漸譜
吸罷臨風憶舊游
天末相思獨
延佇呼龍欲載小茅
君共向白雲雲裏煮

酒 談薈温州酒有蒙泉豐和春

甌江逸志唐人酒

青春松醪春之類
永嘉豐和春亦著名
酒史蓋傲
於唐也
又有名碧露者
徐昌穀贈王敬止
令永嘉
詩有金盤湛碧露之句
近今佳釀號為金酒者
或
謂色黃如金或謂釀法創於金氏
未知孰是
昔人
有云永嘉及紹興酒絕佳勝
於蘇州又不知其何如也

琥珀紅 葉適記永嘉風土詩琥珀銀紅未是醇私
沽官賣各生春

黃精 雁山志山多黃精土人鬻以代糧但不能知
九蒸九曝之法耳此物雖處處有之惟以雁蕩者

為佳又以雁蕩絕頂不聞雞犬聲者為上品

本草綱目

鉤吻狀似黃精葉與莖却不同一則養人一則殺人其性毒烈與黃精遠甚服黃精者不可不察

蓼羸 本草拾遺生永嘉海中辛辣如蓼

本草綱目紫色有斑

文

枸杞 溫州府志王元貞居大若山修煉其徒朱孺

子掘枸杞根煮之飲其汁輕舉

紅花 萬歷溫州府志染絳亦入藥頗行遠

綠草 雁山志根有子如麥大名綠草米即麥門冬
也能治熱渴

香薷 雁山志性溫能治暑消煩止渴煖胃靈巖寺
馬鞍嶺下石坦中產者佳

金銀花 雁山志性涼解熱毒土人用以作湯治諸

瘡花初開時黃色後轉白色故名金銀藤有汁而甘謂之啜蜜

山蘿藦 雁山志性寒狀如圃種者土人用治癰疽搗汁服之查塗亦可

何首烏 雁山志巖下石畔皆有之惟靈巖寺佛殿下一本甚大蔓延於外絕與他蔓不類其根之大可如栲栳但為殿楹所壓無從取之耳

益妳草 本草拾遺生永嘉山谷葉如澤蘭莖赤高

二三尺味苦無毒治五痔止血灸令香浸酒服

石決明 草木子海中大螺也生於南海崖石之上
海人泅水取之乘其不知用手一撈則得使其覺
知雖用斧鑿亦不脫矣

雪裏開 雁山志性大寒深谷中有之能解砒毒冬
時開花故名

金線重樓 雁山志性寒能治諸熱毒

金釵石斛 雁山志性寒生麥地中歲取入貢

苔草 隆慶樂清縣志出山門鄉海中有數種

蓀草 溫州府志平陽蓀湖蓀芷叢生

茜草 萬厯溫州府志土人取以染絳

蕒草 隆慶樂清縣志多芒可為纜為席為履

菅草 隆慶樂清縣志土人取其榦以織壁

鳳尾草 雁山志生巖石間葉如鳳尾性寒入痢藥

金線草 雁山志名蠅殼草葉圓如蠅殼蔓生節間

有紅線長尺許生巖石上性亦寒涼治湯火瘡

金星草 雁山志葉上有金星點根中有黑筋如髮

俗傳用以浸油塗頭上禿處則髮生

風癡草 萬厯温州府志俗傳其葉一折風癡一次

二三如之土人恒占焉

瑞安縣志自生山間其葉如蒟人每年視葉之截知

風之次數及先後

絡帚草 萬厯温州府志土人取以為帚

菖蒲 雁山志深谷中有之亦有一寸而九節者但

無服食之方耳

鶴 温州府志平陽鶴巢山古松老幹鶴時巢其上
錦雞 雁山志形似雞毛五色紋每日至午間胸前
雜毛斑斕叢起宛如錦綬土人謂其吐錦過午則
斂自矜其容每臨水自照或溺而死

山雞 萬厯温州府志出山中嘴足皆紅

子規 禽經注甌越間曰怨鳥夜啼達旦血清草木
翠碧 隆慶樂清縣志其毛可以為飾

白鷗 雁山志形似雞而大白色毛有黑花細紋長

尾生深谷溪澗中

淘鵝

萬厯温州府志出雁蕩

練鵲

雁山志形似鵲而小尾長而色白

繡眼

萬厯温州府志出雁蕩

金雀

雁山志似雀而色黃與黃雀相類

搗崖

雁山志似鷹而稍大生海崖中每秋末渡海

海邊人謂之曰崖其色蒼白亦謂之白崖又曰搗

崖以其勢自上而下有如搗也

鸛鷀

隆慶樂清縣志其羽五色善勅水取魚

山樂官

雁山志形似金雀羣鳴而聲相抑揚如作

樂音土人謂之山樂官

畫眉

萬厯温州府志善鳴而好鬪山中多有之

山羊

雁山志其狀如鹿而能厯險白者如雪猿有

毛如猱謂之金線

田狗

雁山志形似狗而小毛深溫厚可作煖耳用

山犬

隆慶樂清縣志出深山食果實

香狸 雁山志形似豬肉香美

玉面狸 雁山志形似貓而有白毛霜後肉美諺云

霜天玉面狸

五段狸 雁山志尾有黑白紋相間各五段肉肥美

竹豚 雁山志狀似小豬兒竹林中有之食筍根味

清美

狔獾 薛季宣思石門游詩注出石門山中狔類獾

而綠獾類狗而黃蓋猴屬之大者

石門山在
樂清縣

野人 續南雁蕩志被毛赤髮狀如人立行

獾猪 雁山志似猪而小肉肥美

野豬 雁山志似猪而大大者重二三百觔健嘴長
牙能與虎鬪

黃魚 萬厯温州府志沿海居民以漁為生立鯨長
管束量船大小納收稅銀給與由帖方許下海採
捕每年三月黃魚生發之時許其結鯨出洋捕魚
五月回港

謹按溫郡沿海海族之產大率同於寧台第郡邑志中不盡述耳觀寧台所志亦可類推以概其餘

斑魚 李孝光大龍湫記潭中有斑魚聞轉石聲洋

洋遠去

香魚 萬厯溫州府志長三四寸味佳而無腥生清

流惟十月有之

樂清縣志以火焙之如黃金色

鮑魚 雨航雜錄狀如鱸而肉粗三腮曰鮑四腮曰

茅鮑所謂鮫魚是也一曰茅狂

玉魚 萬厯溫州府志或紅白相錯又一種純白為

玉魚

鬪魚 游宦紀聞二山溪中產小魚斑文赤黑相間
里中兒鬪之角勝負昔有鬪禽未見有鬪魚亦可
觀也聞永嘉亦有之

白袋魚 隆慶樂清縣志似牛而白自海入江則兆
水潦

龍頭魚 萬厯温州府志温州歲進龍頭魚張孚敬
奏罷之

香魚 雨航雜錄雁山五珍香魚一也

雁山志無腥鱗極細肉甚

美生雁山溪澗中與潮水相通處春初時生月長一寸九月以後可盈一尺則赴潮際生子生已則黑瘠而死於鹹水中次年春初子復化為魚苗仍入淡水中隨月而長五月以後可長五寸味極清美作乾魚尤佳凡山水入江處皆有之在樂清則石門潭為盛筋竹溪芙蓉溪次之蕩水西流於永嘉南溪則自楓林當溪下渡潭石廟潭諸處亦有之均產於蕩水之一源也

鯉魚 雁山志石門潭多鯉魚味甘而清美異於他

產每出時羣浮水上可一二畝許有一巨鯉其長如人衆魚環遶漁者百計終不能得或以為神魚

云

黃駒 萬厯温州府志有河豚烏郎鵠夸魴魚鮫魚
鯢魚之名其肝與子有毒惟橄欖蘆根烏藍草根

甘蔗可解土人以甘蔗同煮有毒則黑

永嘉縣志
西施乳即

烏郎膏味美
染塵不可食

沙蒜 海族志出沿海又名塗筍

石蛭 雁山志產雁蕩山壑中

塗蟾鎖管 雨航雜錄塗蟾生海塗中名望潮身一

二寸足倍之又脚短而無釘者名鎖管温州有之
水母線 萬厯温州府志歲進水母線今罷

蠶醬 爾雅翼今閩浙重蠶子醬其珠如粟南人或
帶或磨飲之云利市殼亦屈以為杓又取其尾為
小如意

蠓 天中記樂城縣新溪口有蠓嶼方圓數十畝四

面皆蠓其味偏好

謝靈運答弟書前月十二日至永嘉郡蠓不如鄞縣蠓亦不如

北海永嘉縣志
甌江蚶黃最佳

琴蝦 隆慶樂清縣志多刺有味

西施舌 嘉靖浙江通志似車螯而扁生海泥中常

吐肉寸餘類舌俗甘其味因名

温州府志一名沙蛤長可二寸如舌

最美產江溪間
又有香螺亦佳

海月 雨航雜錄大如鏡白色正圓其柱如搔頭沈

一中嘗稱其鄉海錯之美如海月江瑤柱可敵三

吳百味樂清甚盛

蠶 瑯琊代醉編永嘉有八輩蠶一曰蛭珍蠶二月

績二曰柘蠶四月初績三曰蜃蠶四月績四曰愛
珍五月績五曰愛蠶六月末績六曰寒珍七月績
七曰四出蠶九月初績八曰寒蠶十月績凡蠶再
養者皆謂之珍然一歲八績亦恐誇者之過

克絲 温州府志溫克絲每尺價一百五十或二百
精巧奪綺縠近樂價賤費輕機戶皆巧偽日就濫
惡

甌紬 永嘉縣志帛之屬有甌紬

溪絹 永嘉縣志絹有溪絹

蕉布 永嘉縣志土人工織蕉布

吉布 温州府志夏布曰腰機冬布曰雙梭最細又有吉布或稱吉貝失其製

雞鳴布 甌江逸志隋志云永嘉之俗婦人勤於紡織有夜浣紗而旦成布者俗呼為雞鳴布

桑絲 隆慶樂清縣志用為紬絹

柘絲 隆慶樂清縣志宜絃琴瑟

紙 太平寰宇記温州產蠲紙

清波別志唐有蠲府紙凡造紙戶免本身

力役故以蠲名今出於永嘉士大夫喜其發越翰墨爭捐善價取之殆與江南澄心堂等甌江逸志蠲紙廣輿記所云蠲糲紙也潔白緊滑過於高麗宿退錄温州貢紙五百張其來久矣明開局於瞿溪差官監造後因水濁製紙轉黑乃以地氣改遷奏罷少此佳紙殊為可惜温州府志造紙以糲粉和飛麩入朴硝沸湯煎之候冷藥釀用之先以紙過膠礬乾以大筆刷藥上紙兩面再候乾用蠟打如打碑以粗布縛成塊揩磨之舊州郡尺牘皆用之今已罷製姑存其法

硯 宣和石譜温州華巖川石出水中一種色黃而

斑黑一種色紫石理有橫紋微粗扣之無聲稍潤

土人鑄治為方圓器紫者亦堪為硯頗剉墨

硯史溫州

華嚴尼寺巖石石理向日硯之如方城石磨墨不熱無泡發墨生光如漆如油有艷不滲色赤而多有白沙點為硯則避磨墨處比方城差慢難斷而易磨亦有白點點處有玉性扣之聲平無韻

竹絲燈 嘉靖浙江通志溫州出

蚌珠 草木子南海中秋有月蚌胎生珠無月則否

龍鬚席 溫州府志草細而涼暑月寢之可當蘄簟

近時方盛

雁山志龍鬚草產雁山者莖細而秀種者如藝稻織席通四方

漆器 溫州府志鵝色綠色牙色錦犀純朱刻花退

光磨光捲素剔金灑金泥金嵌螺漂霞今漸失其製

礬 温州府志平陽宋洋山有之取石細擣淘漚清者為明礬濁者為白礬

銀 隆慶平陽縣志邑有銀鑛三一焦溪山一天井洋一赤巖山永樂中採今皆封禁泰順縣志焦溪銀坑在七都高陽明水尾

鐵 温州府志瑞安平陽泰順三縣皆有之取砂磧

淘煉成鐵辦歲課力艱工苦明時減罷

何光遠泰順縣減鐵

課序泰順邑萬山中里少地濶銀場鐵治他邑莫與並逾年既遠所有者不可得如前所賦者不能減於後以聖人利民之具而民反受其累弘治中邑令范勉上其事於朝下屬郡勘白之減其課三之一易曰損上益下其益無疆此所損者小所益者大矣因序其事并繫以詩羣物出土惟鐵乃艱淘沙於水伐木於山輾轉是登歎傾是處病餒欲攘身垢若脯赭熾其火晝夜不眠產鐵一拳能值幾錢肩不停擔足不停步千態萬狀有如荼苦矧茲賦課累歲如之豈謂年遠炭盡砂稀天子命官理絲解纓暗甌生輝以輕易重兆民食德推侯獨賢我作是詩垂千萬年

金星石 萬歷温州府志樂清金星溪世傳張文君

煉丹以餘藥擲溪中並作金星今水中石名金星
石又金溪水石皆有金星

松化石 瑯琊代醉編建中間道士馬自然指永康
縣延真觀前庭松曰此松已千年矣當化為石至
夕大風雨其松果化近觀山中松皆化為石

蜃灰 温州府志以牡蠣殼或蛤殼成堆潑以水即
烟熾漸成灰用以甃砌最堅製船擣以桐油泯其
罅漬水不漏功用甚博甃器舊者以蜃灰白之

謹按溫郡紅花醴青二種為產最多處郡亦然頗利民用實其地之專產故為拈出

處州府

稻 龍泉縣志稻有占城赤早旱湖金華地暴鷓鴣斑海棠碧巖龍鳳竹香等名

南田稻 名勝志青田縣南田山上有沃土宜稻

枯蒼

棠紀青田縣南為南田其地土沃歲旱豐稔如常青田縣志其地止宜稻而麻麥諸蔬少生焉

旱湖稻 龍泉縣志稻有旱湖種於無水之處

鷓鴣斑 龍泉縣志色類鷓鴣因名之

赤米 龍泉縣志邑產早赤稻米色純赤又有赤谷

赤芒

凍米 青田縣志食貨有凍米

鯽魚豆 松陽縣志菽之屬有鯽魚豆

九心菜 崇禎處州府志麗水縣產

紫花芥 隆慶宣平縣志即辣芥

筍筍 筍譜七月生至十月間縉雲以南多出然味

苦而節疎筍可大於箭筍少許山人採剝以灰汁

熟煮之都為金色苦味減而甘食甚佳

簍筍 筍譜出處州竹可作椽筍則春生可食

筆筍 崇禎處州府志縉雲縣葛竹山世傳葛洪煉

丹於此遺筆化筍成竹人取其筍可書數十字

盧棲筍 名勝志盧棲洞傍生竹筍味甚佳

天中記處州宣

平響巖之東有靈棲溪溪上巖洞甚奇唐道士盧欽棲其中有竹每無風自動拂除巖石人以為奇

其筍味佳人

號曰盧棲筍

朱萐 崇禎處州府志慶元縣有朱萐

香萐亦佳不亞於溫

觀音粉 崇禎處州府志雲和山中有白落泥以水

攪研而取之和糯米粉一半蒸食之可以療饑名

曰觀音粉

松 崇禎處州府志縉雲縣松洲上有松千章鬱蒼
之色映於清流

髯松 名勝志龍泉縣匡山多髯松彌望入青雲

雨松 縉雲縣志步虛山斗巖上有二松大數十圍

每晴日則雨點滴瀝濕人衣裾遇晦則無

三鬚松 癸辛雜識凡松葉皆雙股故世以為松釵
獨枯松每穗三鬚

同根松 隆慶遂昌縣志馬鞍山有五株松同根生
枯 名勝志處州稱枯枯字從木宋熙寧間得古碣
云枯松身柏葉即櫟木也以山多此木故名

杉 崇禎處州府志大杉源山跨麗水雲和之間山
上多出巨杉

樟 龍泉縣志飛鳳山有大樟林輪囷百圍披蟠數

十畝

檉 括蒼彙紀檉山上生

栲木 嘉靖浙江通志處州出栲木

赤水木 青田縣志縣有赤水木

相思木 崇禎處州府志慶元縣有相思木

松陽木 名勝志松陽立縣取松陽木為名在縣東

南大溪有松陽樹大八十圍其腹中可坐二十人

鐵蕉 青田縣志葉如鳳尾幹如龍鱗根能食鐵燃

鐵錘入之愈茂

鐵樹 青田縣志鐵樹色古葉如積雪

李 龍泉縣志縣產李頗多有胭脂李最佳又有雞

心李黃甜李麥熟李真珠李琥珀李

崇禎處州府志龍泉縣有

千瓣
李花

楊梅 龍泉縣志楊梅嶺下有泉一窪可沃楊梅旬

日不壞

石榴 龍泉縣志榴之類亦有數種官榴金榴銀榴

飯榴山石榴官榴最大

山林檣 龍泉縣志林檣別一種名山林檣

柿 羣芳譜大而稍扁處州松陽柿尤為奇品

棗 崇禎處州府志括郡治在棗山南麓山有古棗
一株老榦輪囷右枝甚茂

銀杏 龍泉縣志有二種一種細小稍圓名香杏又
一種稍長大名鴨嘴杏

榛 括蒼彙紀松陽之果有榛子

梨 隆慶宣平縣志舊產鵝梨本佳品今漸稀少

青果 青田縣志有青果

橙 橘錄木有刺似朱欒而小永嘉植之不若古枯

之盛香氣馥馥可以薰袖可以漬蜜真嘉實也

嘉靖

浙江通志處州橙糕
搗橙以蜜和而為之

枝粉 青田縣志枝樹之實可作粉

蔗 龍泉縣志有糖蔗竹蔗

荷 崇禎處州府志黃巖下有芳前十里池宋南渡

選妃洪氏有寵賜第於此有十里磚街十里池池多栽荷又名芳墅

菱 龍泉縣志菱有數種紫菱青菱狗頭菱鬼面菱四角菱

碧桃 松陽縣志白雲山有雙石高二百丈頂有石橋橫渡傍有碧桃二株三年一花

紫牡丹 名勝志麗水縣禪智寺有紫牡丹一本高丈餘每開五百餘花花各十二瓣值閏年各開十

三辦宋政和間宣入御苑栽之花即不開詔遣還
山復開如故

蘭 青田縣志石門洞出

神蘭 龍泉縣志石川巖壑秀麗上有樟樹濶數圍
樹之上有香蘭花其香聞數里土人目為神蘭不
敢摘

冬蘭 隆慶宣平縣志雙巖產香遍幽谷

翠柏 枯蒼彙紀松陽之花有翠柏

桂 崇禎處州府志宋孫夙初母壽於中秋夜對月

飲酒忽聞盃中有聲視之三桂子也種之俱茂

金蓮

方輿勝覽仙都山頂有湖生蓮花

崇禎處州府志縉雲

仙都山傍孤石屹然干雲名鼎湖石頂有湖生蓮花世傳金蓮花瓣落於潭因名金花潭

佛桑

崇禎處州府志龍泉縣花有佛桑

珍珠花

崇禎處州府志雲和縣花有珍珠

子午花

崇禎處州府志麗水縣有子午花

鶴頂紅

括蒼彙紀松陽之花有鶴頂紅

木芙蓉 青田縣志小石門山木芙蓉一本高二丈
生石巖上

金絲蝴蝶 括蒼彙紀花有金絲蝴蝶

藤花 青田縣志小石門山後壁削成高數百丈古
藤花垂滿其中

小竹 名勝志青田縣占陽山叢生小竹巨葉其實

可為粉 處州府志宋慶元間歲饑鄉民於此採
竹實為食青田縣志或取以釀酒味佳

舞竹 隆慶遂昌縣志石門洞前有竹冬夏一色風

起則枝梢自舞拂地

棕竹 崇禎處州府志麗水縣產棕竹製為器最良

鳳尾竹 崇禎處州府志麗水縣產

酒 名酒記處州谷簾酒

金盤露 名酒記處州金盤露

麴本草處州金盤露
清水入少薑汁造麴

以浮飲法造酒醇美可尚
香味俱劣於東陽以其水
不及也宣平縣志酒名金
盤露者其色清故得名初
釀於曳嶺大冢今其地竟
無作者

何首烏 圖經本草出處州有苗如藁本葉有光澤

夜則苗蔓相交或隱化不見其根形大如拳連珠亦有形如鳥獸山岳之狀者珍也掘得生喫味甘

甜可休糧

蘇頌何首烏讚神効助道著在仙書雌雄相交夜合晝疏服之辟穀日居月諸

使人難老童顏華腴
惟有緣者遇爾自如

乾菊 括蒼彙紀宣平出

牡鞠苗 名勝志龍泉縣匡山松根茯苓大如斗雜以黃精及牡鞠之苗

接骨草 隆慶宣平縣志酒浸服之以其草傳骨折

處可愈

磁石 本草綱目括之藥屬於金石者磁石雲母石
石燕 龍泉縣志黃麻興山石燕洞中產即今藥中
之所用者雷雨之日則出洞羣飛好事者網得之

一鋸為二置醋盃中能行動者良

豔草 龍泉縣志插於髻間可驅汗氣

墨草 龍泉縣志煉之可染鬚髮

紫草 龍泉縣志大馬鞍山出

青芝 名勝志青田縣大鶴山下其田嘗產青芝

竹青 青田縣志其葉似竹可染碧此地所豐之草

故名青田

薜蘿 名勝志龍泉匡山有薜蘿數十尋嫩綠可茹

雞願草 龍泉縣志有雞願草

觀音草 龍泉縣志有觀音草

龍鬚草 仙都志產於獨峯崖上

鶴 太平寰宇記青田產相鶴經云青田之鶴即此

永嘉郡記有沐溪野去青田九里中有雙白鶴年
年生子長大便去只恒餘父母一雙耳精白可愛
多云神仙所養青田縣志青
田號鶴城鶴出必得科名

么鳳 青田縣志禽之類有么鳳

烏鵬 崇禎處州府志慶元縣有烏鵬

山牛 崇禎處州府志慶元縣有山牛

竹豬 隆慶宣平縣志一名竹豚狀如鼠惟食竹根
其味甚美

野豬 崇禎處州府志慶元縣有野豬又有鎗豬漢

豬

金鯽 包萬有唐山記遂昌縣唐山翠峰菴有沼常畜金鯽百數聞木魚聲聚而就食

翼魚 姜師閔翼魚說景寧山溪間有翼魚四足飛立樹梢張口注水鳥見水就飲魚漸閉口飲水之鳥伺其腐而吞之

苦魚 劉基苦齋記章溢先生隱居之室在匡山之巔匡山在處之龍泉縣劍溪之水出焉注入大谷

其中多斑文小魚狀如吹沙味苦而微辛食之可以消酒

墨魚 名勝志松陽縣卯山泉有二墨魚浮水人不能取

圓眼魚 崇禎處州府志麗水縣產

蓮心魚 崇禎處州府志青田縣產

桃花魚 龍泉縣志春時溪中出

海鯊 草木子鱗蟲皆卵生也獨海鯊胎生產枯者

最巨

跳魚 姜師閔跳魚說即大蛤景寧溪中當夏月蛤
引類飲澗水每遇蛇則為所噬或蛤多則先以一
巨蛤啣蛇頭蛇則以尾纏之漸移入水蛇尋自壞
巨蛤與羣蛤聚而食之

青螺 龍泉縣志青翠可食

野蜂 劉基苦齋記匡山之巔四面峭壁風從北來
大率不能甘而善苦故植物中性之苦者莫不布

族而羅生焉野蜂巢其間采花髓作蜜味亦苦山
中方言謂之黃杜初食頗難久則彌覺其甘能已
積熱除煩渴之疾

葛紗 崇禎處州府志青田縣出

花布 龍泉縣志邑產花布機布

樹皮布 元和郡縣志處州元和貢有樹皮布

棉苧 縉雲縣志本邑農畝之外少蠶桑多種棉苧

女紅之利居田租之九

竹紙 括蒼彙紀松陽宣平出紙青田縣志出竹紙

山墨 隆慶宣平縣志墨山出山墨窰人取為點磁

之用

漆 括蒼彙紀松陽產漆頗行遠

白蠟 崇禎處州府志松陽縣出

瓷器 龍泉縣志章生二不知何時人嘗主琉窰凡

瓷器之出於生二窰者極其青瑩純粹無瑕如美

玉然一瓶一鉢動博十數金其兄名章生一所主

之窰其器皆淺白斷文號百圾碎亦冠絕當世今

人家藏者尤為難得

七修類稿哥窰與龍泉窰皆出處州龍泉縣南宋時有章

生一生二弟兄各主一窰生一所陶者為哥窰以兄故也生二所陶為龍泉以地名也其色皆青濃淡不一其足皆鐵色亦濃淡不一惟土脉細薄油水純粹者最貴至今處人稱為章窰菽園雜記青甕出於劉田去龍泉縣六十里次有金村等窰泥油精細模範端巧不及劉田龍泉縣志龍泉昔產窰器青甕窰在琉田道泰大其垺安福蛤湖因溪垺官田俞溪大浪坑烏甕窰在宏山陳灣磚窰在大沙塘田里山南坑直衙大口蘆陂沛田缸窰在劍池湖惟甕窰昔屬劍川自析鄉立慶元縣窰地遂屬焉近亦窰戶稀絕矣

礦 處州府志龍泉縣銅山唐書地理志云山出銅

松陽縣產銀鉛錫宣平縣產鐵

龍泉縣志黃銀即
淡金其採煉之法

與白銀略不同此礦脈淺無穿巖破洞之險每得
礦不限多少俱舂碓成粗粉然後以水浸入磨成
細粉仍貯以木桶浸之用楊梅樹皮漬攪數次石
粉浮而金粉沉乃用金盆如洗銀法洗之即加鉛
煮和再過灰鍋煎乾成銀矣每黃銀一錢直白銀
四錢近得一法將黃銀或淡金用土釜銷化入石
硫黃些小三四次出火鎚去青黑鬆皮中心遂成
赤色黃金若色猶未赤再銷如前其青黑鬆皮加
鉛鎔化入灰鍋煎乾乃汞銀也原淡金一兩得黃
金七錢必得白銀三錢煎法以淡金打成薄片用
黃泥包文武火燒一晝夜遂成金其白銀滲入泥
中無復出脫期矣然近時匠人甚巧每於人家出

色金首飾其洗落藥水紙貯鎔鉛過灰窠成金首飾一兩折一錢又白銀烹煉法按五金之礦生於山川重峰峻嶺之間其發之初惟於頑石中隱見礦脈微如毫髮有識礦者得之鑿取烹試礦色不同精粗亦異礦籬重三十斤呼一節得銀多至二十兩少或三四錢礦脈深淺不可測有地面方發而遽絕者有深入數丈而絕者有甚微久而方潤者有礦脈中絕而鑿取不已復見興盛者此名為過僻有方採於此忽然不見而復發於尋丈之間者謂之蝦蟆跳大率坑匠採礦如蟲蠹木或深數丈或數十丈或數百丈隨其淺深斷絕方止取礦則携興鐵及鐵鎚竭力擊之凡數十下僅得一片又有不用鎚興唯燒爆而得礦石既採則入碓房舂碓極細是謂礦末次以大桶盛水投礦末於中攪數百次謂之攪拈凡桶中之拈有等浮於面者謂之細拈桶中者謂之梅砂沉於底者謂之粗礦

內若細拈與梅沙用共底淘盆浮於淘池中且淘
且汰泛颺去粗留取其精英者其粗礱內則用一
木盆如小舟然淘汰亦如前法大率欲淘去石末
存其真礱以桶盛貯璀璨星星可觀是謂礱肉次
用米糊搜拌團如拳大排於炭上更以炭尺許覆
之自旦發火至申時住火候冷名曰窖團次用坪
銀爐熾炭投鉛於爐中候化即投窖團入爐用鞴
鼓扇不停手蓋鉛性能收銀盡歸爐底獨有滓垢
浮於面凡數破爐爬出熾火掠去爐面滓垢烹煉
既熟良久以水滅火則銀鉛為一是為鉛駝就地
用上等爐灰視鉛駝大小作一淺灰鍋置鉛駝於
灰窠內用炭圍壘側扇火不住手初鉛銀混鎔泓
然於灰窠之內望泓面有煙雲之氣飛走不定久
之稍散則雪花騰湧雪花既盡湛然澄徹又少頃
其色自一邊先變渾色是謂窠翻窠翻乃銀鉛之
名烟雲雪花乃鉛氣未盡之狀鉛性畏灰故用灰

以銷鉛鉛既入灰惟銀獨存自辰至午方見淨銀
鉛入於灰名爲灰坯乃生藥中蜜陀僧也續處州
府志萬厯中開採黃巖坑先用輦水役徒數百人
增車至一百三十五輛動糜帑十餘迨涸烹砂不
足以償工食熾炭之費又慶元坑場舊有十處或
巖閉洞塞或水積淵深俱經往時採壞即有一二
處出礦所得不足以償所費且地界閩浙礦徒嘯
聚輒爲地方害又雲和縣原有陰巖鳳尾二坑礦
脉盡絕見今封閉僅有三都土名大盤金塢鐵冶
二處可得微利萬厯中知縣陳文照建議於春夏
秋三季播種之時濁水有害禾苗
嚴禁不許淘洗惟冬季始許洗烹

鐵砂 枯蒼彙紀青田縣閣公方山出鐵砂可爐鑄

凍石 崇禎處州府志青田縣閣公方山出圖書石

如玉

青田縣志縣南有圖書洞洞穴深邃入其中冬溫夏涼出石如玉柔而栗宜刻印章亦可

琢玩器俗名青田凍七修類稿圖書古人皆以銅鑄至元末會稽王冕以花乳石刻之今天下盡崇

處州燈明石果

溫潤可愛也

花石 龍泉縣志槎洲之東有花石灘灘中石子有

黑白黃紫青赤等色

松石 名勝志松陽縣卯山時有怪石如松有枝葉

上猶石 宣和石譜處州上猶縣山土中出石微紫

質稍麤多淺黑斑點兩暈外暈綠色堪作水斛或

闌檻好事者往往鑿礮斃地上全若玳瑁

石棋子 名勝志遂昌縣牛頭山唐葉法善嘗與道
侶對奕於此局終擲棋子於地化為石後人於其
地每得一卷石中有小石棋子圓滑紺白初出土
尚溫軟可擘取

薪 枯蒼彙紀縉雲管溪官山薪竹之饒民利賴之
自然碓 縉雲縣志東蒙巖一石拳根矗立澗水走
其下相傳為仙人藥碓

浙江通志卷一百七